

WANTOK



OCEAN BLUE

Tuna in oil
Rait teist
yah!




Wan Wik, Ogas 18 - 24, 2005 NAMBA 1622

Niuspepa bilong yumi ol PNG stret! K1.00 long Mosbi tasol - Ausait Mosbi K1.30

HOS TEKOVA

Lukim stori long pes 8...



Yam na taro bilong Kabwum
i gat namba. Lukim stori
long pes 25

Catholic Reporter bilong
mun Ogas i stap insait...



HEPI 30
INDIPENDENS
PNG, I KAM
LONG
WANTOK
NIUSPEPA

ABG

RAUSIM

OL SAINA

OTONOMES Bogenvil Gavman (ABG) i makim tude olsem taim we olgeta Esia bisnis manmeri husat i nogat pepa long wokim bisnis long Bogenvil long lusim provins.

Bogenvil Eksekjutiv Kaunsil (BEC) i bin tok oraitim dispela oda long rausim olgeta bisnis man bilong Esia i wok i stap insait long provins bihain long ol i kisim planti bel kros i kam long pablik.

Bogenvil gavman i kisim planti wari toktok i kam long ol memba bilong wan wan ol konstituensi husat i tok ol i no wanbel olsem namba bilong ol bisnis man bilong Esia i wok long go antap insait long Bogenvil.

Vais Presiden na Minista bilong Tred na Indastri Joseph Watawi, husat i go pas long wanpela wok painimaut long ol bisnis bilong 5-pela Saina bisnismen we i no bin bihainim lo, i tok dipatmen bilong em i wok long putim was long ol wok bisnis insait long rijen bai ol ausait bisnis na invesmen i mas bihainim stret lo bilong Papua Niugini na Bogenvil.

"ABG i laikim ol tru tru bisnis manmeri long kam insait long nupela otonomes rijen bilong mipela. Tasol ol bisnismenmeri husat i laik mekim bisnis long hia i mas bihainim ol lo bilong dispela kantri na bihainim stretpela wok pasin," Mista Watawi i tok.


Kabinet i bin tok orait long rausim ol Saina bisnismen stat long Ogas 15. Wok painimaut we i bin kamap aninit long lukaut bilong etministresen na Buka Taun Atoriti, i painim olsem namel long olgeta Saina bisnismen i wok long Bogenvil, wanpela tasol i bihainim lo bilong kantri.



FOOTY FEVER

Baim MAJOR APPLIANCE (RETAIL) long BRIAN BELL na kisim **FREE** NRL BALL, NRL BACK PACK, NRL CAP o NRL COFFEE MUGS


Hiarap, promosi bilong
pinis August 31st, 2005




FREE
NRL BALL
taim yu baim
wanpela
ais bokis



FREE
NRL BACK
PACK taim
yu baim
4 burner gas
o pawa stov



FREE
NRL CAP
taim yu baim
masin bilong
wasim klos



FREE
NRL MUGS
taim yu baim
Microwave
Oven.



FREE
NRL BALL
taim yu baim
ais bokis.

Brian Bell
Shop with a friend

BB Dispela offer em bilong RETAIL na Consumer Credit Customers tasol

Ol Ripot bilong Melanesian Spiahet Grup (MSG) bung long Goroka wantaim Sape Metta

PNG Ox & Palm bai go long Fiji

KON bif Ox & Palm tin mit bilong Papua Niugini bai i ken kamap long ol stoa long Fiji bihain long ol toktok em ol MSG treid opisa i mekim long Mande long dispela wik.

Fiji em i kantri i save salim Ailan kon bif i kam long PNG, we i bin putim tambu long baim Ox & Palm i go long kantri bilong ol stat long 2002, long wanem PNG i no stretim ol kwarantn wok bilong em.

Tasol bihain long klostu foapela yia, Fiji i luksave long ol gutpela ripot PNG i kamapim na i lukluk nau long impotim o baim Ox & palm i go long kantri bilong ol gen.

Tupela arapela wansolwara kantri, Vanuatu an Solomon Ailans i save baim Ox & Palm bilong PNG em Hugo canning kampani i save wokim.

Long MSG Treid an Ikonmik Miting (TEOM) long Mande Fiji i tok em i stopim eksport bilong Ox

& Palm long 2000 bihain long ol i kisim ol ripot long wanpela wok glasim we i bin kamap long Hugo Kening kampani.

Na Fiji i givim toksave we em i no nap impotim Ox & Palm sapos kampani ya i no nap long givim gutpela ripot long sait bilong seniteri na kwarantn.

Tasol ol TEOM opisels i tok kampani i kamapim pinis gutpela ripot we Ox & Palm bai i no i nap bagarapim ol lain husat i save kaikai dispela bif.



TENKYU: Bikman bilong Skauts Mista Prassanna (holim ki) wantaim ol hetman bilong PNG Skauts Asosiesen i amamas wantaim ol nupela kompyuta na nupela bas bilong ol.

Skaut lida raun long PNG

Andrew Molen i raitim

BIKEPELA tingting bilong Scout Asosiesen long Papua Niugini em long traun na kisim moa manki long bihainim ol.

Dispela em i wanpela as long raun bilong Rijinol Dairekta bilong Scouts long Manila, S. Prassanna Shrivastava long Pot Mosbi long dispela wik na tupela de trening em i givim long ol Scout lida.

"As bilong mi long kam em long helpim na developim ol Scout lida na tu skulim ol long wokim ol plen na ol gutpela we bilong menesmen," Mista Prassanna i tok.

Wok bilong Mista Prassanna i kamapim Scout insait long Esia-Pasifik rijen na ol raun bilong em i kisim em i go olsem long Fiji, Kiribati na PNG.

"Mipela i toktok tu long ol sampela samting we mipela i ken wokim long developim wok bilong ol Scout insait long PNG na Pasifik rijen.

"Planti bilong ol dispela samting mipela i save toktok long en, long-

pela tam i kam na nau mi kam long givim skul na toktok moa long lukim olsem ol dispela wok i ken i go het," Mista Prassanna i tok.

Sief Komisina bilong Scouts long PNG, Meja Sere Kala i tok asosiesen i amamas long kamap bilong Mista Prassanna na wanem tingting em i kam givim long ol bai i nap long helpim na developim wok bilong ol lida na tu Scout asosiesen long PNG.

Long wankain taim em i givim 25 kompyuta na wanpela 15 sita bas long PNG Scout Asosiesen het opis long Hanuabada long Pot Mosbi we kos bilong dispela ol samting i winim mak bilong K20 000. Ol nupela kompyuta masin bai helpim long nupela trening progrem bilong ol skaut.

"Dispela progrem bai i kam aninit long edukesen bai ol i ken lainim tu long yusim kompyuta bilong wanem nau long dispela taim olgeta samting i wok long kompyuta na em bai i gutpela long ol i ken save long yusim dispela masin," Meja Kala i tok.

Sir Rabbie givim salens

MINISTA bilong Foren Afes Sir Rabbie Namaliu i bin givim bikpela tok salens bihain long em i opim Melanesien Spiahet Grup (MSG) sinia opisas miting long Goroka, Isten Hailans provins long Tunde.

Em i tok i gat luksave olsem senis long ol paitim tok bilong dispela yia we ol toktok long MSG miting i kamap bikpela.

Em i tok MSG nau i luksave tu olsem senis long ol pasin kalsa tu i kamap bikpela.

"Dispela ol senis we i wok long kamap em i soim olsem bai yumi ken lukim planti salens bai i kam kamap long yumi tu."

Em i tok bikpela miting bilong ol MSG lida bai kamap we Praim Minista Sir Michael Somare wan-

taim ol arapela wanwok bilong em bai kam antap long Goroka long fonde (tete) na long Fraide (tumora), ol bai i sindaun na go het wantaim dispela bikpela MSG kibung.

Na luksave tu i stap olsem ol lida bai sindaun an paitim planti bisnis toktok long wanem i gat planti samting long paitim tok long en.

"Long dispela yia bai yumi lukluk long ol sosel askim, ol salens, politikel treid, ikonmik na ol toktok bisnis," Sir Rabbie i tok.

Sir Rabbie i tok pasin kalsa bilong yumi em i wankain, "olsem na yumi mas strongim dispela pasin na yumi i ken luk-

luk long kamapim gutpela kaikai em yumi gat tingting long en."

Em i tokim ol sinia opisels olsem ol bikpela toktok we bai i kamap long tete na Fraide em long sait bilong:

- Sosio-politikel na wok sekyuriti;
- Ap-deit long wok i kamap long Bougainville;
- Rijinel asitens misin long Solomon Isalnds (RAMSI);
- Pasifik plen;
- Rijinel sekyuriti fos;
- Fremwok long serim intelijens infomesen; na
- Maritaim.

Polis bai taitim wok

POLIS bai taitim wok sekyuriti tete (Fonde) taim Praim Minista Sir Michael Somare na ol arapela wanwok bilong em long ol narapela kantri bai kamap long Goroka, Isten Hailans provins long sindaun long MSG kibung.

Sir Michael i makim PNG an ol narapela wanwok bilong em, em Sir Allan Kemakesa (Solomon Islands), Mista Ham Lini Vanuaroro (Vanuatu) na Foren Minista bilong Fiji, Kaliopate

Tavola wantaim FLNKS Deputi Presiden, Victor Tutugor.

Deputi Polis Komisina Operesens, Garry Baki i tok nau yet moa long 300 polis manmeri bai putimap strongpela wok sekyuriti long Goroka.

Em i givim strongpela toktok i go long ol lain husat i laik kamapim ol protes mas, na traun long kamapim ol arapela bikhet olsem dispela em i no taim bilong kamapim kain ol samting.

Mista Baki i tok ol wokmanmeri bilong em bai i stap long olgeta kona bilong Goroka taun long givim sekyuriti long ol opisels na lidas husat ol bai kamap long MSG miting.

Nau yet ol skul pikinini an ol singsing grup i redi long welkamim ol lidas ya taim ol i kamap long Goroka ples balus long tete (fonde) apinun.

Long tumora (fraide) moning ol lida bai go long Yunivesiti ov Goroka na opim MSG miting.

Tiensten tok welkam

TREID na Indastri Minista Paul Tiensten i bin kamapim bikpela tok amamas taim em i tok welkam long ol Melanesia wantok na ol arapela bikman long PNG na ol mausman long Saut Pasifik husat i bin kamap long MSG bung we i bin stat long Goroka long Mande.

Em i tok tru tumas, dispela miting i makim namba 14 MSG Treid na Ikonmik Miting bilong ol opisa na em i ting dispela kibung em i bikpela tru we i gat planti gutpela tingting we ol Melanesien Grup bai ken sindaun na skelim i go kam.

Ol dispela tingting em i makim em:

- Em i namba wan miting bihain long MSG Treid Agrimen em ol i bin lukluk na pasim long las MSG Treid na Ikonmik Opisel miting we ol i bin kamapim long Suva, Fiji las yia.
- Namba tu em Dispela miting i givim sans na opim rot long MSG long kamapim ol grup long sindaun na toktok long wanem ol ikonmik na patnasip agrimen bai i ken tingting strong long kamapim long ol arapela treid arensmen insait long rijen.



Hevi bilong mani i stap yet: Tosali

Yakam Kelo i raitim

PAPUA Niugini i nogat inap mani bilong stretim olgeta hevi bilong em.

Dispela em toktok bilong seketeri bilong Treseri Simon Tosali long bung bilong CIMC long dispela wik long Mosbi.

Maski Papua Niugini i wok long lukim ol bisnis na ekonomi i wok long kamap gut na tu prais bilong ol samting kantri i salim long ovasis maket i gutpela, dispela i no helpim long daunim planti hevi kantri i gat i stap, Mista Tosali i tokaut.

Em i tokaut olsem sapos mipela skelim Australia na Nu Silan wantaim mipela hia long PNG bai yumi lukim olsem wanpela wokman bilong Australia i save kisim olsem K27,000 long wok bilong em long olgeta yia.

Long Nu Silan, wanpela wokman i save

kisim olsem K20,000 long wok bilong em long olgeta yia. Na long PNG em wanpela wokman i save kisim olsem K600 long wok bilong em long olgeta yia.

Dispela em piksa we i soim olsem wanpela PNG wokman i save sot tru long planti samting bikos mani em i kisim i no inap long baim ol samting em i laikim long helpim famili na sindaun bilong ol.

Tasol em i tok gutpela senis we gavman bai kamapim long neks yia insait long 2006 baset bai lukim K100 milien moa long baset bilong dispela yia 2005.

Dispela i min olsem bai totol baset bilong PNG inap go antap long K4.8 bilien bikos 2005 baset i bin K4.6 bilien.

Mista Tosali i tok dispela senis o go antap bilong baset i kamap bikos long moa wok bisnis i kamap long kantri na ol kago PNG i sal-

im long ovasis maket i wok long kisim moa mani i kam insait long kantri we i lukim moa mani i kam long kantri nau.

Ol bisnis tu i mekim mani long gutpela menesmen bilong kantri na ol wok bilong en we i lukim ol praivet sekta na arapela indastri eria i stat long mekim gut bisnis na gavman i kisim gut mani long takis na ol eria em i save mekim mani long en.

Moa mani bai kam long takis we gavman i save kisim long olgeta yia na liklik bai kam long ol ovasis helpim olsem grent (AusAID) na arapela long bisnis wok bilong en.

Mista Tosali i tok dispela 2006 baset bai kamap biahainim gutpela menesmen na wok dispela gavman i mekim long lukim ol program na polisi bilong em i wok na ol bisnis bilong kantri i stat long pilim strong na kirap. Dispela em i as bilong gutpela senis long



BIKPELA toksave i kam long Nesanel Disasta Opis, ol lain husat i save wok lukaut long ol kain kain bikpela hevi i ken kamap insait long kantri. Stat long tumora bai i gat ol bikpela solwara na drai rip i winim mak bilong dispela i kamap long stat bilong dispela yia. Em i no tok lukaut long sunami. NOGAT TRUI Sapos yupela lukim solwara i ronawe long nambis. Noken ting olsem em i sunami. Em i drai rip tasol.

TUDE planti samting i no olsem bipo. Bipo sapos papa i askim, pikinini bai givim tasol. Wanpela bikman long Tred na Indastri i paul liklik yet biahain long Papa bilong em i salim toksave olsem em i sot long liklik toea. "Plis, tokim pikinini blo mi olsem mi laikim K100. Tasol nogut bai mi painim hat long bekim, inap em i salim K20 tasol i kam?" Pikinini man ya i kisim wanpela kain sik taim em i harim papa i salim dispela toksave i kam.

OL BIKMAN bilong ol wansolwara i wok long paitim tok i go kam long tin mit bilong PNG i go long Fiji na tin mit bilong Fiji i kam long PNG. Narapela wantok i tok: "Kros pait i go kam, maski ya. Mipela inap pinis long bikpela prais bilong olgeta kain kain tin mit. Nau mipela no bisi, tin mit bilong husat. Sapos prais i go daun, mipela bai baim." Tok i go pas pinis. Yupela yet skelim.

TRU tumas, prais bilong ol stua kaikai tasol mekim na mipela i save raun painim maket. Tasol nau, ol maket tu i gat ol kain kain liklik rot bilong apim prais bilong ol samting. Wanpela mekpas kumu long wanpela maket, prais bilong em K1 ol bai kisim na go brukim na salim long narapela maket long 50 toea wan wan. Bai mipela go baim kaikai long we gen?

Pipel i sot tru long sevis

... i no Hela provins

Yakam Kelo i raitim

TOKTOK bilong Hela Provins em long ges na wel tasol na i no sut stret long ol bikpela sevis olsem rot, haus sik, skul, lo na oda na ol bikpela sevis bilong helpim pipel long provins.

Dispela em wari tru bilong yut siaman bilong Hela eria Robert Turubis.

Mista Turubis wantaim ol yut bilong Hela i bin wokabaut i go long Mosbi na tokaut olsem toktok bilong Hela em sampela lain tasol i toktok long en bikos long bikpela wel na ges projek insait long provins.

Mista Turubis i tok long Tari taun rot i bagarap, ol mama i

karim pikinini long kendol lait, skul i bagarap olgeta, Tari ples balus i bagarap, nogat benk na ol pipel i kra i tru long ol dispela sevis i mas kamap gut. Maski Hela provins o Sauten Hailans provins, bikpela samting em sevis bilong ol pipel. Sekretri bilong Hela yut Charles Mabiria i tokaut tu olsem ol i toktok pinis wantaim planti yut long provins na ol i sanap wantaim wanpela tingting tasol. Ol i wanbel olsem gavman i mas stretim ol sevis long Tari na ol ples insait long Hela eria bikos dispela em bikpela wari tru bilong ol pipel.

Mista Mabiria i tok wanpela gutpela tingting em ol lida bilong provins wantaim olgeta mausman i mas kam bung wantaim na

tokaut long bel na tingting bilong ol stret. Ol i noken lukim ol bikpela risos bilong provins na toktok long en. Ol i mas lukluk tru long laip na sindaun bilong pipel na provins na kantri na toktok.

Tupela yut lida ya i tokaut olsem ol i stap long ples na harim ol bikman long Mosbi na ol taun i toktok long Hela provins na ol pilim nogut tru bikos ol i no toktok long hevi tru ol pipel i pilim na sindaun long en. Olsem na ol i mas kamautim as tru bilong wanem as ol i laik kamapim Hela provins. Ol dispela yut i makim 13 lokol level gavman eria insait long Sauten Hailans provins na ol i wokabaut i kam long Mosbi long autim dispela hevi bilong ol long gavman.

Siaman bilong Hides Lenona Grup, Andakali Kumbugo i tokaut tu olsem ol i no laik sapotim wanpela tingting yet. Tasol ol i save olsem long kamapim nupela provins i mas gat ol gavman opis na sevis i stap pastaim long kamapim provins. Bikpela hevi em nogat gutpela rot na kolta long ol rot long Tari i go long Hides ges na ol projek eria. Ol kampani i mekim bisnis tasol na ol wantaim gavman i no stretim rot na ol arapela sevis long Tari.

Dispela bung em Gavana bilong Sauten Hailans provins Hami Yawari i kamapim long larim ol pipel yet i tokaut long tingting bilong ol long dispela toktok bilong Hela provins bikos em yet i bin mekim planti toktok pinis.

Hevi bilong ren train nupela gavman

Veronica Hatutasi i raitim

NUPELA Otonomes Bogenvil Gavman (ABG) nau i bungim namba wan bikpela salens bilong em wantaim bikpela win na ren i kamapim dai, hevi na bagarap long ailan.

Ol ripot i tok wanpela man i dai pinis, sampela i lus, sampela viles i bagarap taim ren i karim ol haus, ol pik kakaruk samting na ol gaden kaikai tu i bagarap. Ol gavman sevis tu i no go gut nau bikos ren na taitwara i bagarapim rot.

Long dispela wik, ABG Presiden Joseph Kabui i makim Stet ov Imejensi, o ples we bikpela hevi i stap long em na i laikim helpim long Bogenvil.

Long olgeta yia mun Jun, Julai na Ogas em taim bilong bikpela ren long Bogenvil. Tasol bikples na ol eria olsem Siwai, Bana na Buin i save kisim bikpela hevi tru long wanem ren i save pundaun olgeta taim. Dispela kain samting i bin stat long yia 2000 na i go yet.

Toksave i kam long Bogenvil i tok ol strongpela win tu i kamapim bikpela hevi long ol liklik ailan olsem Katerets, Motok na Nuguria. Ol pipel bilong Katerets Allan i kisim taim



Kabui: "Mipela bai helpim"

nogut stret.

Ol ripot i tok ABG i salim pinis ol atoriti long kisim ripot long hevi we ren na taitwara i kamapim long Saut na Sentrel Bogenvil.

Ripot i tok haiwe rot long saut na sentrel i

kam olsem long Buka i stap aninit long wara na long wanpela wik, nogat ka na pipel i bin inap long yusim long i go i kam long Buka. Tasol long dispela wik, taitwara i go daun liklik na isi isi, ol ka inap long kam long Buka long kisim sevis samting.

Long Sentrel Bogenvil, Wara Bakanovi klostu long Manetai i bin bruk abrusim mak bilong em na karim tripela ples na olgeta samting bilong ol. Ol gaden kaikai tu wantaim.

Viles Vito i bungim bikpela hevi tru. Long Siwai, taitwara na bikpela ren i kamapim bikpela bagarap taim sampela bikpela wara i bruk abrusim level bilong ol na karim ol gaden kaikai na ol haus.

Ripot i kam long opis bilong Presiden Kabui i tokaut long 9-pela ples long Siwai we i kisim bikpela bagarap. Em long Mamagota, Pihanawa, Aitara, Moronei, Duisel, Kunnu, Musiminoi, Kimuku na Kohkui. Nau i gat bikpela hevi long kaikai i sot long Siwai.

Presiden Kabui i tok Bogenvil etnministresen i mas kirapim wanpela komiti i ken lukluk long ol hevi na bagarap ol pipel i bungim na tu, long sindaunim pipel bilong ol liklik ailan long ol plantesen i stap nating.

Tok nogat long pasin pamuk

OL KATOLIK meri i no laikim tru gavman i tok oraitim pasin pamuk aninit long lo bilong kantri. Na ol i laikim bai gavman i stopim gumi olsem rot bilong daunim HIV/AIDS insait long kantri.

Moa long 70 mama bilong ol Katolik Peris insait long Pot Mosbi Asdaiosis i bin bung dispela wik long autim strongpela tok agensim ol toktok na tingting i sut long kantri i kamapim lo bilong tok oraitim pasin pamuk long PNG na tu, yusim gumi olsem rot long daunim HIV/AIDS i kalap long moa pipel.

Ol Katolik mama bai givim petisen i go long ol 109 memba bilong palamen long tok nogat long ligelaisim o kamapim lo we i tok oraitim pamuk pasin long PNG.

Nau ol bai salim petisen leta i go long olgeta peris long Pot Mosbi Daiosis na ol arapela 18-pela daiosis i sainim bipo ol i prisenim i go long ol Palamen memba.

Ol mama i tok strong olsem tok oraitim pasin pamuk i kam aninit long lo i no inap long daunim HIV/AIDS bikos em bai skruim tasol ol sosel na famili hevi long kantri. Olsem na ol mama i singaut long ol memba i go bek long ol ilektoret na strongim ol sevis bai mekim ol yangpela pipel i stap long ples na i no kam long taun na go insait long ol trabel na pasin i no stret.

"Sapos gavman i tok oraitim pamuk pasin insait long kantri, husat manmeri i painim rot long mekim mani bai kalap long sans na wokim nabaut. Bai em i stopim ol mama long kisim ol man bilong ol i go long kot. Tu, aninit long skul bilong sios na gutpela pasin, God i yusim long skruim wok bilong kamapim pikinini long gutpela rot na oraitim pamuk pasin bai sakim ol dispela." Catherine Natera, em wanpela Eksekutiv na voluntia long opis bilong Katolik meri i tok.

Klostu K500,000 i go long Bogenvil bai ileksen

Limitet Preferensel Voting (LPV) aweanes mas kamap

Veronica Hatutasi i raitim

BOGENVIL lukluk long klostu K500,000 long karimaut aweanes bilong nupela Limitet Preferensel sistem bilong vot (LPV) long redi long bai ileksen bilong gavana.

Ilektorel opis long Buka i salim pinis ol baset plen bilong em i kam long Nesenel Ilektorel opis long Pot Mosbi na nau em i wetim bekim tasol i stap.

Reitama Torowaru em wanpela bikman wantaim ilektorel opis long Bogenvil Otonomes Rijen (BOR) i tok bikos ol bai yusim LPV long bai ileksen long namba wan taim long Bogenvil, ol ilektorel opis long BOR i mas karimaut ol pablik

edukesen aweanes long olgeta hap bilong rijen.

LPV sistem bilong vot i nupela long PNG we ol vota i putim tasol 1, 2 na 3 long ol kendidet ol i laikim. Na i no olsem bipo sistem we ol vota i save putim X long kendidet ol i laikim.

Long las wik, wanpela woksop i bin kamap long Buka we ol ilektorel opis na ol menesa bilong ol wan wan seksen long Otonomes Bogenvil Gavman (OBG) i bin sindaun long em. Sampela opisa bilong Nesenel Ilektorel Komisn long Pot Mosbi i bin go pas long woksop.

Mista Torowaru i tok ol bai fomim wanpela LPV aweanes komiti long Bogenvil bilong go pas long ol wok aweanes.

Em i tok ol i laikim bai ol sinia menesa i kliat gut long ol samting i sut long LPV na ol bai wokim gutpela plen long em.

Em i tok long dispela wik, ileksen Menesa wantaim ol opisa bilong em bai sindaun wantaim John Siau em wanpela bikman long Bogenvil Etministresen long kirapim dispela LPV aweanes komiti. Komiti bai redim ol plen long deit, taim na ples long rijen we bai aweanes i kamap long em.

Wok long bai ileksen bai stat long mun Oktoba na long mun Februeri neks yia, Bogenvil bai save long nupela gavana bilong em long kisim ples bilong olpela gavana John Momis husat i bin risain olsem gavana long mun Epril long dis-

pela yia long resis long Otonomes ileksen.

Mista Torowaru i tok ol bai statim ol LPV aweanes wok taim ol i kisim mani long Ilektorel Komisn long Pot Mosbi.

Em i tok ol bai karimaut LPV aweanes

long tripela hap.

Namba wan hap em long trening bilong ol trenas. Long dispela, ol bai laikim namer long K45-50,000 long kisim olgeta Distrik Menesa long provins i go long Buka long sindaun insait long wanpela wik

woksop. Namba tu em long Fil trening we ol Distrik Menesa bai go bek na wantaim helpim ol opisa long Bogenvil etministresen, ol bai karimaut trening long ol wan wan distrik. Kos bilong karimaut dispela wok inap long K50,000.

Namba tri na laspela em long aweanes stret long olgeta hap bilong Bogenvil we kos inap long K380,000. Putim olgeta kos wantaim i kamap long K478,000.

Bikpela mani bai go long haia bilong Trepsot.



Lukaut: Ka bilong ples Bana i bihainim Panguna main rot na hap ol i kamap long en i nogut tru. Dispela hap em bikpela singaut nau i kamap long ol i mas stretim olgeta dispela rot long wanem rot i bagarap olgeta.
Foto: ALOYSIUS LAUKAI

South Pacific Tourism ORGANISATION

Namba 5 Baienuel Konfrens bilong ol Minista
"Turisim: Invesmen bilong bihain taim bilong yumi"

Miting Ples: Holiday Inn Ballroom 17 - 18 Oktoba 2005

Ol lain husas bai tokok bai ghim ol pepa long ol dispela samting:

De 1: Mahe 17 Oktoba

Sesun A:	Investmen - Dokta Harsh Varma
Sesun B:	Ol Babus Kampani (Airlines) - Mista Andrew Drysdale
Sesun C:	Maketing - Mista Andrew Fairley

Bungen bilong kalak bilong ol partim tok long De namba 1

De 2:	Tunde 18 Oktoba
Sesun D:	Sastanabol Turisim o turisim we i ken wok long taim - Dokta Steve Hoakes
Sesun E:	Poyeti Ridaksen o daunim hevi bilong nogat gutpela sigelua - Dokta Trevor Sofield
Sesun F:	Intensibol Herites o tumbuna pasin - Mista Mali Voi
Sesun G:	PNG Kes Stadi long Sastanabol Turisim - Mista Robert Igara

Bungen bilong kalak bilong ol partim tok long De namba 2

Dembetik Delogat Registresen Pepa

Nem/Oi nam	Nem bilong Kampani o opis
1.....
2.....	Telepon:..... Feks:.....
3.....	Email:.....
4.....	Atres:.....

Yu wanpela memba bilong PNGTIA?
Mekim bokis Yes No

K50 wanwan manmeri (Insait long de 1 na de 2)

Yu ken salim peimen bihainim Dairek Diposit i go long 5th South Pacific Tourism Conference Account No. (294) 100 1053852 Bank South Pacific, Port Moresby. Feksim kopi bilong diposit wantaim registresen i go long PNGTIA Fax: 3200223 na putim nem bilong Jim o long YEC Fax: 3201995 na putim nem bilong Dorothy. Ol Memba bilong PNGTIA, sapos yu laik regista, pls ringim PNGTIA opis.

O lukim website bilong mipela: www.spto.org

Oi bikpela sponga:

Oi sponsa i sapot long en:
Crown Plaza, Holiday Inn, Jason's Media Travel, Hertz,
Post PNG na Coral Sea Hotels

Dispela wok i kam ananit long lukaut bilong:

BIABIA EM GO HOLIDE LONG PLES... EM SINDAUN LONG NAMBIS NA KISIM GUTWIN...

AAH!! DIS IS LAIF! DOH! MASKI WOK MIRILEK TASOL!

HAH! OL BRO WQA TAIM BOM ISTAP. BAI MI GO RAUSIM OL NA MEKIM OL HQM MEID BOM NA GOAIT.

HAU EM I GO PAINIM OL WOATAIM BOM NA MEKIM OL HQM MEID BOM NA GO AIT LONG BIK SOLWARA...

YOHOOO!! WASAUT OL PIS! SADAM HUSEN I TROMOI BOM I KAM!! BUSH YU PAIA!

BAROOM!!

KLOSTU TSUNAMI KAMAP...

Talasea laikim tripela ilektoret

Steven Kadiko i raitim

OL lida na pipel bilong Talasea Open Ilektoret i laikim bai ilektoret bilong ol i mas bruk i go tripela hap.

As long dispela em namba bilong ol manmeri long dispela ilektoret i go antap winim 128,000 pipel olgeta.

Long wanpela bung long las wik Fraide, ol presiden bilong 6-pela Lokol Level Gavman insait long Talasea Ilektoret i sanap wantaim ol pipel long tokim Provinsel Ilektorel Baunri Komiti (PEBC) olsem ol i no wanbel long ol tingting bilong sanapim ol nupela baunri ilektorel Baunri Komisin (EBC) i kamapim long en.

Long disisen we EBC i wokim, ol i brukim Talasea Open Ilektoret i go kamap tupela. Em long Talasea Open na Biala Open Ilektoret.

Wankain tu long brukim Kandrien Glosta Ilektoret i go long tupela hap we i kamapim bel hevi long ol lida bilong Talasea Open Ilektoret.

Deputi Gavana Philbert Kadiko i sanap olsem siaman bilong bung na i tok ol pipel na ol lida i mas sanap strong wantaim laik bilong brukim Talasea Ilektoret i go long tripela hap. Ol dispela ilektoret i mas kamap olsem Talasea, Hoskins na Biala Open.

Long tingting bilong kamapim mak long ol nupela ilektoret, EBC i katim sampela eria bilong Talasea Open i go insait long mak bilong Kandrien na tu, Glosta Open Ilektoret. Tasol ol lida na pipel bilong Talasea Ilektoret i egensim tru dispela tingting na ol i laikim Kandrien Glosta i stap yet olsem wanpela ilektoret. As long en em populesen o kandim bilong ol pipel long dis-

pela ilektoret i sanap olsem 55,685 na em i no inap long gat tupela ilektoret.

Presiden bilong Talasea LLG na wanpela sinia stetman, Sir Lucas Waka i tok bikpela as tingting long agensim ol tingting we EBC i mekim i olsem, nupela ilektoret bai brukim ol wan pisin lain na long wankain taim tu, brukim ol sampela LLG eria we i no stret na ol pipel na lida i no laikim bai kamap.

Sir Lucas i tok em i glasim ol tingting we EBC na Talasea LLG i kamapim na em i kamapim tingting bilong em.

Namba wan em Kandrien Glosta eria we i gat 55,685 pipel i mas stap yet olsem. Biala Open wantaim 40,292 pipel na tupela LLG em Hoskins LLG na Biala LLG, Hoskins Open wantaim 47,962 pipel na tripela LLG, Bali Vitu,

Kimbe Eben na Talasea LLG.

Em i tok ol pipel long provins na moa yet, ol pipel bilong Talasea i lukim olsem ol dispela ripot long laik bilong ol bai gutpela na i no inap brukim ol wanpisin lain na LLG bilong ol.

Saiman Kadiko i askim ol opisa bilong Provinsel Ilektorel Baunri Komisin long wok hariap long dispela tingting bilong ol pipel long givim long Nesanel Baunris Komisin taim ol i mekim wokabaut bilong ol i go long Kimbe long Septemba 22.

Provinsel Ilektorel Baunri opisa Alois Valuka i tokim ol pipel olsem tingting bilong ol i gutpela na ol i gat strongpela bilip olsem EBC bai tok orait tasol long em.



PROSESIO: Ol Katolik bilong Sentrel Bogenvil i wokim lotu long pestode bilong Mama Maria.

Foto: ALOYSIUS LAUKAI

Kimbe holim turis woksop

Steven Kadiko i raitim

OL turis opereta na na bisnis manmeri long Kimbe i stap insait long wanpela wik turis trening woksop long skruim save bilong ol long wok turisim.

Woksop i bin kamap long Kimbe Bei Hotel na i bin stat long Mande Ogas 15 na bai pinis tumora Fraide.

Ol opisa bilong Turisim Promosen Atoriti (TPA) long Mosbi we Nancy Holland i go pas long em i bin holim dispela trening woksop.

Ol sumatin bilong Kimbe, Ruango na Gigo Praimeri skul i bin putim ol naispela tumbuna bilas na putim kamap ol tumbuna samsam bilong makim opim bilong woksop.

Mis Holland i tok bikpela tingting bilong holim dispela trening woksop i bilong skulim ol turis opereta na bisnis manmeri long ol samting we ol i

mas mekim long turis bisnis bilong ol i kamap gut na bai i ken kisim gutpela samting long en.

Wanpela bikpela samting bai ol i toktok long en em long wanem bikpela samting turis bisnis inap kamapim. Na tu, woksop bai lukluk long wanem ol hevi turis bisnis i save bungim long ol wok bilong ol na rot we ol bai stretim ol.

Mis Holland i tok PNG em i wanpela kantri long Pasifik Ailan i gat planti turis ples na bilas inap pulim ol turis long narapela kantri i kam lukim na givim bikpela mani long ol turis opereta na kantri wantaim.

Em i askim sapot i kam long Provinsel Gavman long helpim ol liklik turis opereta long provins i ken go het. Nau yet, nesanel gavman i givim K2 milien i go long TPA long karimaut ol trening woksop long olgeta hap bilong PNG.

Etministresen salim helpim long Vito pipel

SINGAUT i go long Otonomes Bogenvil Gavman sapos em i ken kirapim wanpela "disasta fan" bilong helpim long taim bilong hevi.

Wantok i kisim ol toktok long dispela bihainim bagarap na hevi we bikpela ren i kamapim long Bogenvil insait long tupela wik.

"Long dispela kain taim olgeta yia, Bogenvil i save gat bikpela ren na taitwara na i moabeta nupela gavman i wokim samting nau long sanapim disasta fan we bai stap sambai long helpim pipel taim kain hevi i kamap," wanpela man Bogenvil husat i no laik bai Wantok i sutim nem i tok.

Helpim i go pinis long ol pipel bilong ples Vito insait long Sentrel Bogenvil we bikpela ren na taitwara i bagarapim ol.

Presiden bilong Otonomes Bogenvil Gavman (OBG) Joseph Kabui i tok Sentrel Bogenvil Distrik opis long Arawa na Bogenvil Etministresen i salim pinis sampela kaikai we pe bilong ol inap long K5,000 bilong helpim ol pipel taitwara i karim ol haus na ol gaden kaikai bilong ol.

Wanpela man long Saut Bogenvil i dai pinis taim taitwara i karim em na wankain tu long sampela haus long saut na Sentrel Bogenvil we i stap klostu long ol bikpela wara. Bogenvil i gat moa long 100 bikpela na liklik wara wantaim na long taim bilong ren, ol pipel i save kisim bikpela hevi na bagarap i save kamap long ol gaden kaikai, ples na rot.

Ol ripot i tok Mista Kabui i bin go sekim ol bagarap eria tasol Wantok i no bin nap long toktok long em.

TOKSAVE

NATIONAL JUDICIAL SYSTEM

SUPREME, NATIONAL NA DISTRICT KOT BAI
WOKIM 4TH KOT EXHIBITION LON
29TH AUGUST -2ND OF SEPTEMBER 2005

VENUE: KOKOPO KOT HAUS

THEME: KISIM KOT IKAM KLOSTU LON OL
MANMERI

DISPELA EM WANPELA PABLIK AWARENESS
PROGRAM LON LAINIM OL MANMERI LON
KOT PROCEDURES & PROCESSES NA WANEM
SAMTING SAVE KAMAP LON KOT

OLGETA MANMERI NA OL SKULS I WELKAM
LON KAM



Australian Government

AusAID

CONTACT: Assistant Registrar, Ms June Micka
Tel: 9828750, Fax: 9828467

Japan tok 'nogat kompenseseen' long Wol woa 2

Neville Choi i raitim

GAVMAN bilong Siapan i tok i nogat as we ol i ken peim kompenseseen long ol lain manmeri husat i bin kisim bagarap long Wol Woa 2 long han bilong ami bilong Siapan.

Seken Seketeri bilong Embasi bilong Siapan, Shunsuke Ono i tokim Wantok Niuspepa olsem taim ol ami bilong Amerika na Australia i bin pasim Triti ov Pis o bel isi wantaim Siapan long 1951 long daunim olgeta askim long woa, ol Alais i rausim olgeta askim bilong ol manmeri bilong ol long ol hevi ol i karim long taim bilong woa.

"I mas kliia tu olsem long dispela taim, Papua Niugini i bin stap aninit long lukaut bilong Australia o i bin stap olsem Tras Teritori bilong Yunaitet Nesens, na Australia i bin wanpela long ol

Alais. Olsem na Japan i no inap stretim ol askim bilong kompenseseen i kam long Papua Niugini," Mista Ono i tok.

Long wankain taim, Papua Niugini Ridres Asosiesen, grup husat i makim maus bilong ol PNG pipel husat i bin kisim bagarap long han bilong ami bilong Siapan long Wol Woa 2 i tokaut olsem ol i gat as long kisim kompenseseen yet.

Siapan bilong PNG Ridres Asosiesen, Gabriel Laku i tok grup bilong em i wanpela long 19 kantri i stap aninit long wanpela Intanesenel Kolisin i wok long pait hat long kisim kompenseseen bilong ol lain kisim bagarap long Wol Woa 2.

Mista Laku i tok ol memba bilong em i kam long olgeta hap bilong kantri.

Em i tok grup bilong em i wok long traim long kisim luksave

bilong gavman bilong Papua Niugini yet long kisim kompenseseen bilong ol dispela lain.

"Somare gavman i tokaut pinis olsem em bai no inap long luksave long PNG Ridres Asosiesen, long wanem PNG i gat wok bung wantaim Japan.

Japan em i wanpela long ol bikpela lain i save givim helpim mani na Japan em i wanpela bikpela memba long ADB Bod. Somare yet i tok PNG Ridres em i wanpela kago kal o kon man bisnis taim em i wok long toktok long wok bilong Papalain," Mista Laku i tok.

Laku i tok em i wok long bihainim dispela wok long kisim kompenseseen inap long 12-pela kris-mas nau.

Ol man bilong PNG i hatwok nating long wok olsem kago boi.

Ol pisaman bilong Morobe kisim helpim

OL pipel bilong Morobe bai kisim helpim long promotim pis bisnis insait long provins.

Morobe Fiseris Menesmen Atoriti (MFMA) na Frabelle (PNG) kampani (FPNGL) i wok bung long helpim ol asples pipel long Morobe long 4-pela liklik piseris developmen projek. Em long Rurel Kostel Fiseris Developmen projek (CFD), Kostel Fiseris Developmen program (CFD) na Akua kalsa developmen program (AD).

Dispela ol liklik pis projek bai kisim moa asples pipel i go insait long pis bisnis.

Na long mekim isi moa long ol pipel, MFMA i kamapim ol rot long helpim ol pipel.

Kos bilong ranim pis bisnis i bikpela na dispela i mekim na planti ol asples pipel i no save bisi long go insait long dispela bisnis.

Olsem na aninit long program, MFMA i kamapim wanpela rot wantaim FPNG em wanpela lida long pis bisnis long Morobe provins bilong sapatim ol asples pisaman. Na kampani ya i tok orait long wokim dispela.

Kampani i tok orait long givim fri ol saplai ais na baim pis bilong ol pisaman ya.

"Program bilong mipela i bihainim FPNG na dispela em i gutpela piksa long wok patna wantaim wanpela praivet kampani. Ol pisaman i no inap wari long prais bilong piul

na pe bilong ol arapela samting bikos maket i stap we bai baim pis bilong ol," Weti Zozingau husat i go pas long MFMA i tok.

NFMA i givim dinau mani long ol grup long baim ol liklik bot bilong painim pis long ol.

Na ol i no yusim ol autbot na dingi long go painim pis long em olsem ol i wokim long planit yia i kam inap nau.

Em i givim K800,000 dinau mani i go long ol ples lain bilong baim ol bot bilong painim pis.

Aninit long dispela program, ol pleslain bai kisim dinau mani long Maikro Fainens Beng long Wau na baim 6-peloa bot.

MAPS Tuna kampani em wanpela pising kampani long Lae bai i sapatim tu dispela program bai menesim ol bot.

Mista Zozingau i tok ol dispela program i bibainim dispela bilong ol praover sekta na i gutpela rot stret long bihainim bilong developim ol risos bilong solwara.

Yuropien Yunien i sapatim dispela program we em i givim K50,000 i go long Maikro Fainens beng long Wau na ol fisaman i kej kisim ol liklik dinau mani long baim ol samting ol bai yusim long painim na kisim pis long em.

Ol i makim nupela wau Maikro Fainens beng olsem menesa bilong mani bilong EU i kam insait na helpim ol liklik manmeri.

As ples kopi groas kisim taim

OL as ples kopi groas insait long ples Nankina long Raikos long Madang i wok long karim bikpela hevi tru taim ol i laik kisim kopi bilong ol i go long mil stret long kisim gutpela prais.

Ripot i kam long ples Nankina olsem planti kopi bala i save baim dispela kopi long laik bilong ol yet long mekim bisnis bilong ol yet.

Ol as ples manmeri i tok taim prais bilong kopi insait long kantri i go antap, ol dis-

pela namel baia i save giamanim ol na ol i save baim long liklik moni tru.

Ol groa i tok ol i save tingim hat wok bilong ol na ol i no save wanbel.

Long dispela as tasol, tripela man bilong Mibu insait long Nankina i bin go toktok wantaim Dairekta bilong Kopi Industri Koporesen long mun Jun long dispela hevi.

Long wankain taim ol i bin askim em long toksave long

CIC bod long Madang i mas lukluk long stretim hevi bilong ol.

"Moa kopi i save bagarap long dispela eria na ol groas i save painim hat tru long

wanem rot tru bai ol i salim kopi bilong ol. Olsem na mipela i laik autim hevi

bilong mipela long Wantok Niuspepa."



Pe de: Taim ol i kisim pe bilong kopi, maski prais i gutpela, ol namel bai i save daunim prais yet



Rot i bagarap: Tasol ol trangu kopi groas i mas karim bek kopi bilong ol na bihainim ol bus rot

Lae Voko poin gat nupela bris

WOK long sanapim liklik wof o bris we ol pising bot na ol arapela sip bai yusim long Voko Poin long Lae bai kostim K1.5 milien. Dispela em long sapatim pis bisnis insait long Morobe provins.

Wok i kamap wantaim K1.5 milien helpim bilong Esia Developmen Beng (ADB). Wanpela konsalten bilong ADB i kamap

pinis long provins na ol i statim pinis wok wantaim ol opisa bilong piseris.

Morobe Fiseris Menesmen Atoriti (MFMA) i wok long go hetim program.

Narapela projek we ADB i sapatim em long givim moa sapat na trening long ol woklain bilong MFMA na ol pisaman bai kisim gutpela samting long en.

Wanpela stadi i we 4-pela opisa i karimaut i kamap nau na dispela bai mekim ol piseris opisa i kliia gut long pipel na level ol i sanap long em long pising bisnis.

Dispela stadi bai skruim ol wok go het long plen bilong ol risos bilong solwara.

I no long taim i go pinis, Morobe Provinsel Gavman na wanpela PNG kampani i bin

sainim agrimen bilong luksave long developim akuakalsa o wok i sut long wara insait long Morobe provins.

MFMA i go pas long kirapim dispela program.

Ol manmeri husat i save yusim Voko Poin long mekim ron bilong ol nau bai amamas long mekim laip bilong ol i isi.

Atis soim olsem laip i no hat sapos yu hat wok

James Kila i raitim

WANPELA yangpela man bilong ples Porosa insait long Okapa distrik long Isten Hailans provins i tokaut olsem laip insait long kantri bilong yumi tude i no bagarap.

Dispela yangpela man nem bilong em Pinaga Uwambe em wanpela yangpela atis bilong Isten Hailans provins husat i soim tru save bilong em pinis long droim na penim planti ol gutpela piksa na salim. Em i bin salim ol piksa long Goroka taun.

"Planti manmeri long kantri i save tok olsem laip i hat tru. Oli save sutim tok olsem ikonomi bilong kantri i bagarap na laip bilong ol liklik manmeri tu i bagarap pinis.

"Dispela ol toktok bilong ol i no tru. Dispela ol toktok ol i mekim em bikos ol i les tasol long wok na ol i mekim ol kain toktok olsem" Atis ya Uwambe i tok.

Dispela yangpela boi bilong Okapa i fokaut olsem i gat planti gutpela rot i stap em ol pipel i mas putim tingting bilong ol stret na kamapim gutpela wok long helpim sindaun bilong ol long ples o long taun. Taim ol i mekim dispela ol liklik wok olsem ol bai gat mani long poket bilong ol.


Pinaga Uwambe i bin greduet long Krietiv Ats Fekulti bilong Yunivesiti ov Papua Niugini. Bihain long em i pinisim skul tupela krismas i go pinis em i go bek gen long asples bilong em long Goroka na skul long Yunivesiti ov Goroka we em i

stadi long pos greduet long diploma long edukesen.

Dispela save Pinaga i bin kisim long UPNG Ats Fekulti i helpim em nau yet taim em i stap sumatin long UOG.

Bagaros ya i save droim na penim ol piksa na salim long helpim em wantaim liklik poket mani bilong em taim em i stap sumatin yet.

Pinaga i tokaut olsem namba wan piksa em i penim na salim em i bin kisim K750. Dispela piksa em i mekim em ol manmeri i mangalim o aigris tru long em. Dispela yangpela atis bilong Okapa i gat moa save long penim ol piksa long kenwas, dro wantaim wel, printim ol singills na mekim ol piksa yusim kompyuta masin.



KARIM KAIKAI: Uwambe i tok man i no les bai karim gutpela kaikai.
Foto: JAMES KILA

Long dispela wik tasol long Mande em i bin raun i go long Kopi Industri Koporesen na bungim pablik rilesens opisa, Tebi Naged na bagaros ya i salim wanpela penting em i droim lapun man bilas wantaim kopi. Em i

bin salim dispela piksa long K250. Mista Naged i amamas long em na tokim em long droim wanpela gutpela piksa bilong kopi diwai gen wantaim logo bilong CIC.

Stretim Okapa rot

Paulus Tali i raitim

PLANTI ol kopi groa na baia long Okapa distrik, Isten Hailans provins nau bai kisim gutpela sevis bihain long wok bilong stretim rot i pinis.

Dispela i kamap bihain long Memba bilong ol Tom Amukele i

givim K747, 000 i go long baim ol buldosa na beko long mekim wok.

Memba i baim tu tupela tipa trak long karim graun na karanas bilong rot.

Em i tok namel long 2003 na 2004 em i bin givim samting olsem K100, 000 long wan wan yia long airim ol

praivet beko long stretim rot. Na dispela em i lukim i antap moa. Long dispela as em i baim dispela ol buldosa, beko na tipa ka bilong distrik yet long stretim rot.

"Long baim bensen na mekim ol ron dispela i kosim mi K60,000 long baim Toyota Len-Krusa

bilong Lokel Level Gavman," Mista Amukele i tok. "Ol rot i nogut tru long ol ka i ron i go i kam: na ol pipel i givim gutpela sevis long mekim wok bilong ol. Tasol nau olsem mi kisim ol nupela samting pinis dispela bai stretim sampela hevi bilong ol."

Bikpela tingting bilong em long lukim olsem 250,000 manmeri bilong em long Okapa i kisim kopi i go long bikpela maket long Goroka.

Em i tok nau yet wok bilong stretim rot i go het long Kimi rot we planti ol kopi groa i stap long en. Em i makim K100,000 bilong dispela rot.

Sampela mani em i kisim long stretim rot i kam long Distrik Rot Impruvmen Projek (DRIP) em nesenel gavman yet i sanapim.

Em i givim bikpela tok tenkyu long Praim Minista Sir Michael Soamre na Minista bilong Mani na Treseri, Bart Philemon, na Minista bilong Nesenel Plening, Arthur Somare long kirapim tingting na kamapim dispela kain projek long helpim ol pipel.

Aninit long dispela projek Okapa distrik i bin kisim K300, 000 na dispela mani Memba i laik yusim oigeta long stretim rot.



BIPO: Hevi bilong Okapa rot i holim ol kain kain ka olsem.

50 yia Golden Jubili

James Kila i raitim

BIKPELA Kristen selebresin bilong amamasim 50 yia Golden Jubili bilong Katolik Sios long Goroka daiosis i bin stat las wik Sande wantaim bikpela lotu.

Namba wan lotu i bin kamap long Seint Mary's haus lotu long Goroka taun na i lukim moa long 3,000 manmeri i kamap long misa.

Bisop bilong Goroka Daiosis yet, Francesco Sarego i bin go pas long misa wantaim Pater John Ryan.

Ol manmeri i bin bilasim ples gut tru wantaim ol gaden kaikai olsem banana, suga kein, yam, taro na tapiok long mekim ples i luk nais long amamasim dispela aniversari.

Stat bilong misa i bin lukim ol grup bilong Momase, em Charles Basse i go pas long givim samsam wantaim wanpela singsing tumbuna bilong Manam Ailan long prosesio i go insait long haus lotu.

Narapela gutpela prosesio long taim bilong ofering i lukim ol lain bilong Denglagu long Simbu provins i karim buk

baibel na mekim tumbuna singsing na ol i karim gutnius baibel i go givim long han bilong ol lain bilong Goroka.

Bikman bilong ol lain Isten Hailans husat i kisim buk baibel long ol Joseph Hanamo bilong Faniufa viles long Goroka i tokim ol lain Denglagu olsem ol Katolik bilong Gortoka i givim bikpela tok tenkyu long ol lain misinari na katekis bipo husat i brukim bus na maunten na karim gutnius bilong bikpela Jisas Krai Papa God na Holi Spirit i go long ol pipel bilong Goroka.

Dispela singsing na singsing ol lain bilong Denglagu i mekim i bringim sore na wari stret long planti lain na sampela em aiwara bilong ol i pundaun.

Gutnius bilong God i bin kirap long Alexishafen long madang na i go olsem long Denglagu na Gembogl long Simbu na bihain long yia 1955 long mun Ogas stret em i bihainim rot i kam olsem long Kongi long Apa-Abaro i kam long Nambla na bihain i suruk i kam daun long Not Goroka na bihain em Seint Mary's sios long Goroka taun.

YAMAHA PRE-INDEPENDENCE

LIMITED OFFER

E40XHML-R

- 40hp Enduro
- 2 Cylinder, 2 Stroke engine
- Tiller Handle Manual Start
- Fitted with Overheat warning device

Special Price

K8,990
Price Includes GST

Ela Motors

Port Moresby Ph 322940 • Lac 4781800 • Kokopo 9829100 • Madang 8522188
Wewak 8562255 • Kavieng 9842788 • Kimbe 9835155 • Tabubil 5489060
Vamino 8751254 • Buka 9739915 • Lihir 9864099 • Alotau 6410100

Offer Expires : 31 / 09 / 2005 or While Stocks Last.

Available for immediate delivery



Hos bilong ronim raskol

Andrew Molen i raitim

KOMANDA bilong Sentrel provins polis, Sief Inspekta Peter Taiang i singaut long polis dipatmen, gavman na ol arapela ogenaísesen husat i laik helpim, long baim ol hos bilong polis.

Dispela ol hos bai ol i yusim long mekim wok raun insait long provins i go long ol ples we ka i no inap long go long en.

Em i mekim dispela singaut long Sogeri las wik Fraide long greduesen bilong sevenpela polisman olsem ol raida o man husat i ken kalap na draivim hos.

"Yumi ol menesa na ol bos bilong polis i mas painim ol rot bilong senisim o mekim kamapim gut moa wok bilong yumi long we bai yumi mekim gut wok na tu long wankain taim i no inap yusim planti mani tumas," Sief Inspekta Taiang i tok.

Em i tok ol polis bilong Amerika, Inglen na sampela ol arapela kantri i gat polis bilong raun long hos na

lukautim ples tasol nau Papua Niugini tu i gat dispela yunit.

Ol i save kolim ol "maunted polis yunit" na wok bilong ol i wankain olsem ol narapela yunit tasol ol i no save raun long kar na wilwil o ol i no save yusim dok long painim na holim ol bikhet man, kar bilong ol em hos.

Narapela samting em i tok long em tu em, hos i no kos bikpela mani long lukautim na em i ken i stap long taim moa long kar.

"Long dispela taim nau we dipatmen i sot long mani, hos em i wanpela rot we yumi bai sevim planti mani na kamapim gutpela wok bilong yumi bai i stap yet," Inspekta Taiang i tok.

Inspekta Taiang i tok, "You bai no inap westim mani long lukautim o putim long woksap olsem kar.

"You givim wara, gras long kaikai na malolo tasol na em bai i gat strong long wok moa yet."

Em i tok wanpela kar bai go long woksap bihain long faipela yia na prais bilong

petrol na bensin tu i antap tru, tasol hos ken i stap moa long 15 krismas.

Prais bilong wanpela hos wantaim ol samting bilong em olsem rop, su na satel o samting bilong sidaun long baksait bilong hos bai inap olsem K2,700.

Em i tok amamas long ol opisa husat i greduet na em i tok ol i noken lus tingting long save ol i kisim.

"Yumi i gat trening i stap nau tasol hevi em polis i nogat hos.

"Tingting bilong mi em bai olgeta stesen insait long provins i mas i gat olsem tup na hos na ol opisa husat i save long ronim ol," Inspekta Taiang i tok.

Em i tok em i amamas olsem Sentrel provins em i namba wan provins long kamapim dispela em bai gutpela long lukim em i go aut long ol arapela provins we rot i no gutpela tumas.

Nesenel Kapitel Distrik divisinel komanda na Asisten Komisina, Tony Wagambie i bin kamap long dispela bung na em i ama-



Training: Ol Polis man i trening long we long ronim raskol long hos. Foto: ANDREW MOLEN

mas long tingting na toktok bilong Inspekta Taiang.

"Sapos Australia na Inglen i gat mounted polis, yumi long PNG i gat tu tasol long Sentrel Provins tasol," em i tok.

"Bai yumi pusim dispela long dipatmen na gavman sapos ol i ken baim hos bilong yumi," Mista Wagambie i tok.

Em i tok prais bilong wanpela Toyota Land Cruiser em inap olsem K300 000 na dispela mani inap long baim tenpela hos pinis.

"Bai mipela i givim sapot long baim ol hos bilong ol eria i stap autsait," Mista Wagambie i tok.

"Mi save i gat bilip long hos na dok, dok i ken mekim wok bilong tenpela man na

hos em i wankain.

"Mi tingting dispela em i gutpela samting bilong kantri sait," Asisten Komisina Wagambie i tok.

Konstabol Garry Maddie bilong Bereina distrik husat tu i greduet olsem wanpela raida i tok tu olsem hos em i wanpela gutpela samting long helpim wok bilong ol long kantri sait.

PRIDE OF PAPUA NEW GUINEA-2005

Intanesinol Kofi Resis

Husat i go pas long en:

Coffee Pacifica, Inc na PNG Coffee Growers Federation Ltd.

Pri Sileksen:

Septemba 12 i go inap Septemba 2005 insait long ol kaping laboratri bilong Goroka na Lae

Intanesinol Resis:

Septemba 26 i go inap Septemba 30 2005, Goroka

Kofi Raun:

Oktoba 1 i go inap Oktoba 4, 2005

Kodinesen:

Boot Coffee Consulting, Mista Willem Boot na Mis Andi Trindle Walker

Het Jas:

Mista Willem Boot



BOOT COFFEE
consulting & training

Salim askim long kisim moa toksave i kam long:

Willem Boot - willembot@bootcoffee.com

Shailen Singh - shailen@coffeepacifica.com

Jon Yogiyo & Bernard Goma - PNG Coffee Growers Federation (Tel: 732 1388 Fax: 732 1385)



Lo bilong Lukautim ol Meri



OL pikinini meri i gat strong, gutpela tingting ns pasin. Yumi mas helpim ol long bilip long ol yet. Ol pikinini meri i gutpela. Ol i gat wankain rait olsem ol pikinini man. Olgeta pikinini eri i gat rait, maski ol i stap long haus, skul o wok olsem haus meri.

- Em i rait bilong ol pikinini meri olsem yumi noken givim palnti wok long ol.
- Em i rait bilong ol pikinini meri we ol man i noken mekim pasin nogut long ol.
- Em i rait bilong ol pikinini meri long yumi mas laikim ol na tingim ol olgeta taim.
- Em i rait bilong ol pikinini meri bilong go long skul na kisim gutpela save.
- Em i rait bilong ol pikinini meri long pilai na amamas gut.
- Em i rait bilong ol pikinini meri long go long skul na kisim gutpela save.

Moa long neks wik

O! Toktok i kam long liklik buk, "Rait bilong ol Meri."

Sotpela Tok Lukaut Skruim Tok long HIV/AIDS

Bai yumi lukluk long "Living Positively" taim yu gat binatang bilong AIDS

SAPOS wanpela famili memba i gat binatang bilong AIDS, yu ken helpim long planti rot.

Yu ken mekim ol wankain long ol arapela famili memba i stap orait.

Yu ken larim ol i malolo na helpim mekim ol haus wok bilong ol.

Yu ken go long maket na baim ol gaden kaikai bilong strongim ol wantaim ol gutpela kaikai olsem.

Yu ken helpim ol i rausim pret na nogat man i bisi long ol taim yu toktok gut long ol.

I gutpela long famili bilong yu i save sapos yu gat binatang bilong AIDS bikos ol i ken helpim yu na givim yu sapat long mekim ol plen long futja, hevi long mani. Bai i mekim isi long yu sapos yu no haifim situesen bilong yu long famili stret bilong yu.

Sapos wanpela famili memba i gat binatang bilong AIDS, yu ken givim lo kaikai na dring, helpim wasim ol klos bilong ol na lukautim ol.

O! Toktok i kam long Liklik Buk "Living with HIV/AIDS"



Kuk Kona wantaim MERI WANTOK

Stuffed Green Bananas

Yu mas i Gat

- 6-pela grinpela banana.
- 4 auns (oz) mins mit i no tan
- 1-pela anien yu katim
- 1-pela kiau yu brukim na tanim tanim
- Sol na pepa (paua bilong kuk)

We long Kukim:

- 1-Slaisim o katim ol banana long haf. Noken rausim skin bilong ol.
- 2-Autim ol insait bilong banana wantaim spun na larim banana na skin bilong em olsem seip bilong bout o sip.
- 3- Sigirapim ol insait bilong banana we yu rausim pinis wantaim spun.
- 4- Miksim dispela wantaim mins mit, anien yu katkatim pinis, sol na pepa na laspela long en, kapsaitim kiau long holim pasim miksa.
- 5- Putim ol dispela filings i go insait long banana skin i seip o tuk olsem bout na pasim tupela hap skin banana wantaim ol filings o ol kaikai samting bilong putim insait.
- 6- Taitim wantaim string na stimim long 25 minit o beikim long samting olsem 45 minit.
- 7- Sevim wantaim greivi o sos yu wokim long ol kuk tomato.

Madas Yunien helpim famili na komyuniti

Ruben Wia na Veronica Hatutasi i raitim

OL Mama grup insait long ol sios i save mekim bikpela wok long helpim sios, kongriksen, ol yet na famili.

Planti taim, ol i save mekim ol wok isi wantaim nogat bikpela luk-save i kam long pablik, tasol ol wok helpim bilong ol i kamapim gutpela sapat, senis na amamas. Ol grup i save gat ol wok plen na progrem i karamapim spirituel, sosel na edukesenel progrem. Nau HIV/AIDS i kamap, ol i putim i go insait long progrem bilong ol.

Angliken sios i amamasim union de bilong ol mama long Holi Famili peris long Hohola insait long Nesenel Kapitel Distrik we planti yunien memba mama i bin bung long pre na harim ol gutpela tok long strongim wok bilong ol long ol bikman bilong sios na ogenaisesen bilong ol.

As tingting bilong Yunien bilong ol Angliken mama long bung em i bilong luksave na tingim fauna o meri husat i bin kamapim Angliken Madas Yunien (AMU) wantaim moa long 2 milien memba long olgeta hap bilong ol. Dispela meri em Mary Sumner bilong kantri Ingran i bin statim AMU 129 krismas i go pinis long helpim ol mama husat i no stap gut wantaim famili bilong ol.

Wanpela AMU memba bilong Pot Mosbi Daiosis, Mary Ute i bin gat

laik long helpim ol arapela lain i gat hevi na em i joinim AMU long 1999 na kamap Seketeri taim em i stori long *Wantok Niuspepa*.

Misis Ute em bilong Oro provins na em i tok em i bin lusim wok bilong em long Dipatmen blong Pesenel Menesmen long wok wantaim dispela yunion bikos em i bin lukim gutpela wok yunien i mekim long helpim ol famili na spirituel hevi we i go bikpela insait long komyuniti.

Em i tok ol AMU memba i save givim skul long ol famili i gat hevi na wari, kaunseling o stia tok, go lukim ol sik lain long haus sik na haus kalabus na go stap wantaim ol tarangu.

Mary i tok nogat arapela kampani o oganaisesen i sapatim ol.

Em i tok bikpela samting em dispela yunien i gat moa tingting long givim strongim bai famili na kristen laip i ken kamap long gutpela rot.

"Yunien i wok strong long holim skul bilong pasin kristen insait long famili na helpim ol arapela long lainim skul bilong Jisas insait long wan wan komyuniti.

Narapela we em bilong givim enkarjimen o strongim ol papama long lainim pikinini bilong ol long pasin bilip insait long sios. Na ogenaisesen i wok long kamapim kristen felosip wantaim ol arapela manmeri long wol long prea na lip-timapim nem bilong em na givim sevis.

Raun lukluk long ol meri na pikinini



Angliken Madas Yunien amamas: Saplen Pater Lollington Wiam save sapatim gut ol mama i selebretim bikde wantaim ol.



Sios Sevis: Ol yunien memba i makim ol wan wan peris grup.



Luksave long helpim: Mada Blanche Yogomin na narapela yunien memba i bung wantaim ol wanlain long selebresen.



Strongim yet wok: (L-R) Louise Werner em Brens Seketeri na Mada Leila Koteba i wanpela strongpela yunien ida amamas long wok bilong ogenaisesen.

O! Foto: VERONICA HATUTASI



Sevis bilong helpim: Mary Ute na Betty Mandone i wok wantaim long daunim ol famili na komyuniti hevi.

PNG bai go pas long Wol Preia De

OL meri PNG bai redim ol preia bilong Wol de bilong Preia long yia 2009.

Ol meri i bin kisim dispela toksave long las wik taim ol i bung na selebretim dispela de bilong pre long Pot Mosbi.

Dispela i min olsem olgeta preia bai kamap long progrem we bai go aut long olgeta sios grup bilong ol meri long wol em bai ol PNG meri i redim.

Het tok bilong 2009 Preia de em "Many Parts but One Body in Christ" o long Tok Pisin, Planti hap tasol wanpela bodi long Kraïis". Ol Sios grup long PNG bai kamapim

wanpela komiti bilong karimaut ol wok redi long dispela preia de.

Louis Werner em Seketeri bilong desk bilong ol meri wantaim Angliken Sios i wanpela long ol husat bai stap insait long komiti.

Em i tok dispela preia de i save kamap long olgeta yia long mun Mas na em i bikpela samting long sans bilong ol PNG meri i kamap nau long redim ol preia. Olgeta kantri i memba long dispela ogenaisesen i save gat sans long redim preia na dispela em i namba wan taim long ol PNG meri i kisim sans long redim ol preia

long dispela bikpela de we ol Kristen meri long olgeta hap bilong wol i save glasim na pre long ol bikpela samting i karamapim ol, sios, komyuniti na kantri.

Em i tok symbol o sainmak o piksa i makim het tok bilong tingting bilong ol meri PNG em billum bikos em i gat planti yus bilong em. Na em i wanpela samting we PNG i gat luksave long em.

Ol komiti memba bilong mekim ol wok redi em ol bai makim long ol nem i kam long ol wan wan sios.

Wol De bilong Preia i save kamap long namba wan Fraide long mun Mas olgeta yia.

**TOKTOK NATING
Wantaim
Fr. Paul Liwun SVD**



PUMAKOS peris insait long Wabag Daiosis long Enga provins em i namba wan peris mi bin stap wok pater long Papua Niugini.

Taim mi kamap long yia 1990, supiria bilong mi i bin salim mi i go long Pumakos. Mi bin stap 63 de tasol long dispela peris. Bikos i gat bikipela pait i kamap long stesen na supiria bilong mi pilim olsem em i no gutpela ples long mi stap olsem nupela pater long PNG. Olsem na em i bin salim mi go long Pompabus peris i stap long Enga provins tu.

Tupela yia (1991-1992), mi bin stap long Pompabus. I gat kain kain wok pater mi bin wokim long dispela peris. Em i bikipela peris tru na i gat planti komyniti o austesen bilong ol. Mi save mekim progrem bilong mi yet go wokim lotu, lukim ol sik manmeri na lapun na bungim ol manmeri insait long komyniti bilong ol.

Kilimb em i nem bilong wanpela komyniti mi save go lukim ol long olgeta Trinde, bihain long givim lotu skul long Pausa hai skul. Ol i gat wanpela naispela haus lotu ol i bin wokim long kapa na naispela plaua bilong en tu. Em i stap antap long wanpela liklik maunten. Dispela maunten em i wanpela liklik maunten, tasol taim yu kalap i go antap yu nidim 45 minit o wan auwa bikos em i sap tru na i hat long go antap.

I nogat planti Katolik manmeri na planti bilong ol lapun pinis. Nogat wanpela i save tok pinis. Ol i save long tok ples tasol. Olsem na taim mi go, mi mas kisim wanpela boi o katekis long helpim mi long tanim tok long misa bilong mi. Nogat yangpela i stap wantaim ol. Olsem na sampela taim mi tingting: "wanem samting bai kamap sapos olgeta lapun i dai? Dispela naispela haus lotu bai yumi mekim wanem?"

Wanpela Trinde, taim mi kamap i gat tupela lapun man na tupela lapun meri tasol i wetim mi. Narapela i no kam bikos i gat wari i pasim ol. Long maus rot i go antap long haus lotu, i gat wanpela nupela haus i sanap. Em i haus bilong pikinini meri bilong sios lida husat i maritim wanpela man bilong Pumakos. Dispela haus ol i bin sanapim namel long rot i go antap long haus lotu, na yumi no inap lukim moa haus lotu long daun bilo. Bihain ol i bin dikim graun long sait bilong maunten na wokim nupela rot i go antap long haus lotu.

Maski ol 5-pela tasol, mi wokim misa wantaim ol yet. Bihain long misa mipela stori na mi askim ol bilong wanem ol manmeri i no kamap. Nogut ol i gat kompesesen o singsing long sampela hap?

Ol i tokim boi i kam wantaim mi long tanim tok long mi na ol i tok, "manmeri i no kam tude bikos sios lida i pasim rot i kam long haus lotu". Mi bekim dispela tok bilong ol olsem, "Nogat. I gat wanpela nupela rot i kam antap long haus lotu. Mi kam nau bihainim dispela nupela rot tasol."

Tasol ol i no amamas long dispela nupela haus i pasim olpela rot bilong ol. Olsem na planti i no kam lotu long dispela Trinde. Bipo mi lusim ol mi bin tokim ol olsem - "neks wik mi kam bek, yumi bai stretim dispela wari. Yupela mas go na toksave long ol narapela olsem neks wik olgeta mas kam na yumi stretim dispela wari bilong yupela".

Long wik antap olgeta memba bilong Kilimb komyniti i kam bung. Bihain long harim konpesio na wokim lotu, mipela i sindaun long ausait long haus lotu na tok-tok long wari bilong ol. Planti bilong ol i tok strong olsem ol i mas rausim dispela haus long fran bilong haus lotu, larim rot i stap op na ol ken go kam gut. Dispela haus tasol i bin mekim dispela komyniti i no stap wanbel nau. Ol i tok: "Mipela i NO LAIK LUKIM SENIS LONG HAUS LOTU NA ROT I GO LONG HAUS LOTU bilong mipela. Larim rot bilong mipela i stap olsem bipo. Sapos nogat mipela bai i no kam lotu moa. Mipela bai lusim dispela sios na go long narapela sios".

Em i wanpela gutpela tingting o nogat?



**"MAN I LAIKIM TRU LO
BILONG GOD"**

Mi laikim tru lo bilong yu. Mi save tingting long en long san na long nait. Lo bilong yu i stap wantaim mi oltaim na i givim planti save long mi. Na dispela i mekim mi saveman tru na mi winim save bilong ol birua bilong mi. Oltaim mi save tingting long tru tru bilong yu, olsem na mi kisim gutpela tingting tru, na mi winim ol tisa bilong mi. Na save bilong mi i winim save bilong ol lapun, long wanem, mi laik bihainim tok bilong yu tasol. Yu yet yu lainim mi long ol tok bilong yu. Olsem na mi no lusim dipela tok. Hani i save swit long maus bilong mi, tasol tok bilong yu i swit moa yet. Lo bilong yu i save givim gutpela tingting long mi, olsem na mi no laik tru long olgeta pasin nogut.

BUK SONG 119:97-104

Felosip grup i redi long kibung

Veronica Hatutasi i raitim

TAIM bilong Mini Sinot o kibung bilong Yunaitet Sios Eben Rijen long kantri i wok long kam klostu na ol meri tu i wok redi long dispela bung.

Eben Rijenel Wimens Felosip Komiti i bin bung long dispela wik long rijinel opis bilong ol long Metereia long Hanuabada viles ausait tasol long Mosbi siti.

Mini Sinot bung bai kamap long Pot Mosbi na em bai stat long Fraide Ogas 19 inap long de namba 26.

Sinot bai lukluk long ol sosel, pastoral, spiritual isu wantaim tu ol arapela samting i kamap long sios na kantri na rot we sios i ken helpim long daunim ol.

Kodineta bilong Wimens Felosip Komiti long Eben Rijen em Munahu Onno i tok dispela sinot bung i bikipela samting na ol meri i go pas long ol wan wan grup bilong ol long ol seket i stap insait long komiti long kamapim fainol wok plen bilong ol.

Ol Yunaitet Sios Wimens Felosip grup i gat ol progrem we ol i save bihainim insait long wanpela yia.

Olsem ol narapela bikipela sios olsem Angliken, Katolik, Luteran, Salvesen Ami na

Seven De Etventis, ol progrem na wok bilong ol Yunaitet Sios felosip grup bilong ol meri i save karimaut ol wok long lukim na helpim ol sik manmeri, ol pipel i gat binatang bilong sik AIDS, ol kalabus lain na ol narapela trangu lain. Ol i save pre tu

long ol bikipela samting i kamap long kantri na wol.

Long wankain tu, ol i save gat ol litere-si, somap, kuk na henkraf skul we ol mama i save lainim long rit na rait we i ken helpim ol long save long Buk Baibel na kamapim gut laip na sindaun bilong ol na famili bilong ol.

Misis Ono i tok ol meri i save gat ol aweanes na trening woksop long HIV/AIDS na Domestik Vailens bikos ol dispela samting i kamap bikipela hevi insait long famili, na kantri. Na ol meri i mas gat save long ol long lukautim ol yet na famili.

Em i tok bikos long ol dispela aweanes na trening, ol meri i kisim gutpela save nau long helpim HIV/AIDS lain.

TOKSORI

Wantok Niuspepa i tok sori long Angliken na Yunaitet Sios long paulim ol poto na stori. Insait long sios nius las wik, mipela i putim piksa bilong ol Yunaitet Sios Eben Rijen komiti bilong ol meri antap long stori bilong ol Angliken Madas Yunien. Mipela i stretim pinis dispela hevi na piksa i stap wantaim stori bilong em. - Edita

Ol Teptep sios lida kisim salens long wok bung

OL lida bilong Luteran Sios Teptep seket i kisim askim long painim rot bilong strongim wok bilong sios insait long Morobe provins.

Bipo memba bilong Kabwum na strongpela sapota bilong sios wok, Ginson Saonu i bin wokim dispela toktok long pinis bilong wanpela wik sios bung long Dinangat peris long Teptep Luteran Sios Seket long Kabwun Distrik i no long taim i go pinis.

Mista Saonu em i strongpela sapota long sios na ol wok projek sios i kamapim. Em i tok tripela eria we ol sios lida na pipel i ken stap wantaim long ol wok projek em long:

Opis na wokman - Sapos seket peris na kongriksen i gat opis na wokman olsem ol evajelis na pasto long wan wan ples bai wok bilong sios i kamap strong.

Sanapim opis na redim ol nupela wokman olsem sain bot bilong sios long givim bel isi long ol pipel.

Luksave bilong distrik na nesanel sios opis long seket i mas i stap. Sapos nogat luksave, wok bilong sios bai slek.

Wokbung namel long sios na gavman- Tupela sios na gavman i sevim wanpela

grup tasol na em ol manmeri na ol sios na gavman lida i mas givim sapot na semis i go long pipel.

Long dispela rot, sios bai kamap strong long ples.

Bilong makim Morobe Gavana Luther Wenge husat i no bin kamap long bung bikos long sindaun long Palamen, prosek Kodineta bilong em, Mitio Ribon i bin stap long bung wantaim ol.

Ol sios lida bilong Dinangat i bin amamas olsem mausman bilong Gavana Wenge i bin go sindaun wantaim ol na harim ol toktok na tingting bilong ol na tok dispela i gutpela sain long wokbung wantaim namel long ol sios na gavman lida.

Ol pipel i bin kam olgeta long 9-pela peris insait long Som, Urava na Yopna eria.

Mista Mitio i bin tokim ol lida na pipel olsem Gavana Wenge i sapatim strong wok bilong sios insait long Morobe provins.

Em bin tok wanpela rot we Morobe provinsel gavman i kamapim pinis em long Babafic Tras Fan we i sapatim ol pasto bilong sios insait long Morobe provins.



Amamasim Faundas De: Ol Angliken mama i bung long Holi Famili Peris na wokim tok tenkyu lotu na kaikai wantaim long luksave long wok bilong faunda, Mary Sumner.

Mosbi Luteran mama helpim ol refuji

Paulus Tali raitim

OL Luteran Sios mama i givim helpim long ol refuji pipel bilong Wes Papua i stap long boda bilong Westen provins.

Ol mama i bin sindaun long namba 20 konferens bilong ol we Papua Distrik Luteran meri i bin go pas long en na i bin kamap long Marimari sios long Mosbi.

Ol bin kam long ol kongriksen long Pot Mosbi, Sentrel provins, Galp, Popondetta na Westen provins.

Ol bin bungim ol spesel ofa inap long K1,162 na sampela klos na ol arapela samting bilong helpim ol meri i somap long em na givim i go long han bilong mama i makim ol meri bilong Tabubil Luteran Sios.

Tabubil i gat moa long 250 Luteran Kristen i stap tasol ol i save bisi tumas long maining wok. Tasol planti Luteran Sios memba i wok long Kiungai tok ol i laikim wok misin i mas go long Eware refuji kem we i ken helpim spirituel laip bilong ol pipel tu.

Ol lain i go pas long Luteran Sios insait long Nesanel Kapitel i bin tokim ol lain long Tabubil olsem ol bai sapatim ol long wok na tu strongim wok poroman namel long ol bilong karimaut wok misin.

Laimo singautim ol sinia edukesen opisa long kam bung

SALENS i go long ol Provinsel Edukesen Etwaisa insait long kantri long soim lidasip na stretim ol hevi long ol skul long kamapim gutpela kwaliti edukesen.

Long wankain taim tu, tok strong i kamap gen long ol skul i go hetim "self reliance" o pasin long wokim ol samting long helpim ol yet na i no long wetim helpim i kam long ausait insait long 10-pela yia moa i kam.

Edukesen Minista Michael Laimo i wokim dispela singautim long bung bilong ol sinia edukesen opisa bilong kantri i bin kamap long Alotau, Milen Be provins.

Minista Laimo i bin tok tu olsem ol provins i mas sanapim ol Provinsel Edukesen Bot (PEB) we i bihainim lo. Na tu, ol skul i mas yusim gut skul subsidi mani.

Bung bilong stretim hevi insait long olgeta skul long provins...

Yupela ol provinsel Edukesen opisa i gat pawa na visen o driman long kisim edukesen i go het insait long wan wan provins. Mi salensim yupela long soim lidasip long daunim ol hevi long ol skul we i bagarapim skul na helpim ol skul pikinini.

"Mi toktok long ol hevi olsem ol klasrum na haus slip bilong ol tisa i bagarap, menesmen, pasin bilong ol sumatin, ol tisa

i no go long skul, leit long makim ol tisa long ol skul leit na ol liv o malolo pei na balus tiket," Minista Laimo i tok.

Taim em i toktok long Nesenel Edukesen Plen long 10-pela yia i kam we ol i bin lon-sim long dispela yia, Minista Laimo i tok i mas gat gutpela PEB bikos ol i go pas long karimaut ol Nesenel na Provinsel edukesen plen bilong wanem ol i bosim operesen na developmen bilong ol skul insait long ol wan wan provins.

"Ol i mas makim gut ol PEB memba aninit long lo na wok bihainim lo.

"Ol inspekta em ol bikpela namel man long kisim na salim toktok wantaim ol patna bilong mipela bikos ol i makim Dipatmen long provinsel na edukesen skul bot," Mista Laimo i tok.

Em i tok gen ol skul i noken slek tasol go het long painim rot long wokim samting long kisim mani bilong helpim ol skul bilong ol.

"Bai yumi kamapim gut skul long kantri sapos yumi yusim ol risos na helpim yumi yet. Na i no wetim helpim long gavman olgeta taim. Olsem het tok bilong 2005 - 2014 nesenel Edukesen Plen i tok, "Prosperity through self reliance", mi askim strong ol skul long wokim dispela, ol tisa i kamapim gut wok na strongim tu wok patna wantaim ol stekholda o ol lain i save saposim wok bilong edukesen long kantri," Mista Laimo i tok.

Long Nesenel Edukesen plen i wok gut, Minista Laimo i tok gutpela na strongpela patna i mas kamap na stap namel long olgeta stekholda na kontribusen na sapos long olgeta narapela olsem ol Palamen memba, komyuniti, ol papamama, ol bisnis haus na ol sios.

Het tok bilong bung em "From Rhetoric to Reality" o long Tok Pisin, "Lusim pasin bilong toktok tasol mekim samting we bai karim kaikai.

Foto: EDUKESAN MIDIA YUNIT



Skul gut: Ol skul pikinini bilong Milen be i singsing Nesenel Entem long opim edukesen kibung long Masuarina Lods, Alotau.

Pagelio strongim ol provins long saposim resis

OL Provinsel Edukesen Etwaisa long kantri i kisim salens bilong go pas long ol raiting na redio kwis resis we Edukesen Dipatmen i putim olsem hap bilong selebretim ol bikpela samting i kamap insait long kantri.

Nesenel Ivens Kaunsil we i mekim ol wok redi long namba 30 Independens aniveseri i wok wantaim Edukesen Ministri na Opis bilong Nesenel Laibreri long putim kamap tripela nesenel kompetisen o resis long raitim ese o sotpela stori na raitim ol poem wantaim redio kwis. Redio kwis em ol kwesten o askim we ol skul bai makim ol wan wan sumatin bilong salens wantaim ol narapela skul long ansaim ol kwesten ol bikman i go pas long resis i redim pinis. Na dispela resis bai kamap olsem wanpela progrem long redio.

Taim Ekting Edukesen Seketeri Dokta Joseph Pagelio i wokim dispela singaut, em i tok i no Nesenel Kapitel Distrik tasol bai go insait long resis tasol olgeta skul insait long kantri.

Olsem na em i askim ol provins long kamapim komiti bilong go pas

long ol Provinsel Redio Kwis na dispela komiti tu bai kamapim ol kwesten o askim na tokaut long resis insait long ol provins.

Dokta Pagelio i tok komiti bai gat Provinsel Edukesen Etwaisa olsem Kodineta, Nesenel Brotkasting Komisn, hetmistres na hetmasta, tisa na ol arapela memba bilong komyuniti i gat laik long helpim wantaim dispela wok.

Man o meri husat i winim resis long Nesenel Kapitel bai salensim ol wina bilong ol arapela provins long fainel.

Dispela bai kamap long Nesenel Literesi Wik long Pot Mosbi we bai stat long mande Septemba 5 inap long Fraide Septemba 9.

Bai i gat tupela hap long ese o sotpela stori na poetri raiting resis bilong ol skul. Ol Apa Pramerai na Sekonderi sumatin long Gret 6 inap long Gret 12 bai stap insait long resis. Long Open seksen, ol yut na jenerel pablik i ken go insait long resis.

Dokta Pagelio i askim ol sumatin long go insait long ol dispela resis bikos em bai helpim ol long raiting na mekim wok risets bilong ol.

Luteran skul long Asaroka groim rais

James Kila
Iraitim

WANPELA olpela skul bilong Evanjelikel Luteran Sios bilong PNG (ELC/PNG) em Asaroka Luteran Hai skul insait long Isten Hailans i go pas long groim rais bilong ol sumatin long kaikai.

Skul ya i stap samting olsem 25 kilomita ausait long Goroka taun. Em i stap daunbilong long Daulo Pas long gutpela ples na graun arere long Asaro Riva. Dispela gutpela graun long Asaro i mekim na ol sumatin na skul long kamapim gaden kaikai bilong em yet long salim na tu long skul bilong yusim long kaikai.

Skul ya em i wanpela olpela skul bilong misin ol bin kirapim long 1950's. Planti ol save man i holim bikpela wok long gavman, sios, praiwet sekta na komyuniti i bin go long dispela skul. Wanpela bilong ol em olpela Sief Jastis Sir Arnold Amet na bipo PNG Difens Fos Komanda Meja Jenerel Jerry Singirok.

Dispela gutpela stori bilong rais projek long Asaroka Hai skul i bin kamap long 2003. Sampela ol lain save man bilong kantri Saina i bin bringim teknologi bilong ol we ol i kolim long "Jun-Cao" teknologi na wanpela bilong ol dispela projek i lukluk long groim rais.

Agriklasa tisa long skul, Eric Hemute i tok long namba wan taim, skul i bin planim rais insait long 15 hekta gaden na ol bin kisim tripela tan rais olgeta.

Dispela kain rais ol sumatin i planim long Asaroka em ol i kolim long "Golden Maunten" namba wan. Ol i save groim dispela rais long drai graun tasol em i save karim planti kaikai.

Mista Hemute i tok olsem dispela rais prodaksen i wok long helpim skul long sevim mani na tu, ol sumatin i wok long kaikai rais em ol yet i kamapim. Dispela olpela misin skul i gat gutpela histri tru.

Nius Bilong HIV AIDS

wantaim
David
Ephraim



PLANTI taim
yumi save harim ol
tok pait long sekim
blut long save
sapos yu gat HIV o nogat.

Na planti save pret long go sekim blut bilong ol bikos ol pret-nogut bai ol i gat binatang bilong HIV o ol wantok i tok ol i gat binatang HIV.

Planti manmeri i save tingting bilong wanem na mi mas sekim blut bilong mi long painimaut sapos mi gat binatang HIV?

Bipo long yu kisim dispela kain tingting yu mas save olsem HIV i save kalap o kisim manmeri long pasin bilong slip wantaim narapela husat i gat binatang HIV na binatang HIV i save stap laip insait long blut bilong manmeri insait long bodi taim em i kamaut em i save dai isi isi.

Yu mas sekim blut bilong yu bikos yu no save sapos narapela manmeri i gat binatang HIV taim yu tupela i slip wantaim.

Long dispela rot bai yu ken luksave na traime senisim ol pasin bilong yu.

Pastaim long yu go long sekim blut ol lain husat i save kisim blut bai givim yu sampela skul tok bilong helpim tingting bilong yu long taim bilong kisim risal bilong yu.

Bihain long en bai ol i kisim blut bilong yu.

Nau bai mi toksave long sampela hap we yu ken go kisim tok stia na sekim blut bilong yu. Em long yupela ol pipel i stap long bik siti Mosbi tasol. Sore tru mi no klia long ol arapela hap.

Long Mosbi yu ken go long Anglican Stop AIDS long Waigani Opis bilong ol stap bak-sait long Mobil Sevis Stesin o yu ken go long Simon of Sairin Senta long St Theresa Haus sik long Jubili Sekondari Skul long Hohola o go long 3 Mail haus sik long sekim blut em stap long hap bilong yu sapos yu man o meri bilong bikhet long slip wantaim manmeri nabaut em nau yu mas sekim blut. Sapos yu no olsem tingim, strongim yu yet inap yu marit.

Save stap long yu. HIV stap pinis.

Tok Lukaut

Wanpela saveman bilong Amerika i tok lukaut long Papua Niugini long lukaut gut taim em wok wanbel wantaim Saina.

Man Amerika i bin tok olsem Saina em wanpela komunis kantri na em i gat planti pasin nogut we gavman bilong Saina i save wokim i no stret.

Long skelim toktok bilong en wantaim lukluk bilong mi, mi laik tokaut long wanpela bikpela samting we bai kamap sapos gavman bilong yumi i no skelim na glasim gut ol intanesenel wokpren yumi gat long en.

Amerika yet i gat kain resis pasin wantaim Saina na Rasia bipo yet.

Bihain long bom pairap long twin tawa, Amerika em tingting long strongim sekyuriti bilong en wantaim ol kantri stap klostu long en. I

nsait long Pasifik i nogat kain kain hevi olsem long ol narapela kantri i gat. Na tu demokrasi o pasin bilong ronim kantri long Pasifik em save stap gut na tu planti ol risos i stap long han bilong ol pipel.

Yumi mas stopim kain kain kantri long noken larim ol ausait lain i kam insait long ol wok politiks na gutpela sindaun bilong yumi.



Salim ol pas i kam long WANTOK
NIUSPEPA: P.O.
Box 1982, Boroko
N.C.D 111
Fax: 325 2579
Email:
word@global.net.pg

Go autim tok long ples i nogat lotu

Dia Edita

WATPO tru ol man i save autim tok long maket ples? Osem wanem, maket ples em ples bilong baim na salim kaikai long em na em i no ples bilong autim tok bilong God long maket ples. Planti manmeri i no inap harim tok bilong yu long wanem ol i bisi long baim na salim kaikai bilong ol. Na tu maket ples i no haus lotu em maket ples. Planti manmeri i gat save osem na yu noken taitim olgeta rop bilong nek bilong yu i kamaut long ples klia, tuhat nating long

san na husat bai harim toktok bilong yu. Olgeta manmeri i gat lotu na sapos yu laik autim tok orait yu mas i go autim tok long ples we i nogat lotu long em. Yupela i save autim tok long maket ples na long taun pablik ples na em i no gutpela. Mipela i harim harim tok bilong yu long wanem ol i bisi long mipela i pen pinis long dispela kain tok tok. Sapos yu laik autim tok orait yu mas go autim tok long haus lotu.

**ALBERT TONNY
KIMBE
WES NU BRITEN
PROVINS**

Kalsa bilong taun na siti save kamapim hevi na birua

Dia edita

MI LAIK autim dispela bikpela tingting bilong mi long Wantok Niuspepa na mi askim olgeta kalsa grup bilong olgeta rurel eria mas luksave na tingim olsem tru o em giaman, planti taim mi save baim Wantok Niuspepa na mi save lukim planti kalsa grup bilong taun, siti, ol save pilai na singsing. Orait arere bilong dispela piksa bilong ol, ol i save stailim o hailaitim ol gutpela na naispela ol strongpela toktok arere long dispela piksa bilong ol.

Olsem na mi laik tok hevi gro yet birua i stap yet long siti olsem na mi laik askim yu husat yu save karim ol video kamera na raon raon ya. Plis, wanpela taim mekim wei bilong yu na yu kam daun na krugutim asples stret. Bai yu lukim na yu skelim hevi stap o birua i stap. Kalsa bilong ples stret bai kilim tru tru. Mi fri long harim bekim.

**ZUBROS KALSA
GRUP
WASU LLG, TEWAI
SIASSI
MOROB PROVINS**

Salim gan long stua

Dia Edita

MI WANPELA pis na oda komiti i save pait hat tru long stopim ol kain pait na tabel long ples. Osem na nau mi laik putim tingting na lukluk bilong mi long niuspepa.

Bai yumi daunim pawa bilong gan olsem wanem tru?

Tingting bilong mi long stopim o daunim pawa bilong gan, em gavman i mas tok orait long salim gan long stoa bai meri, pikinini, lapun na yangpela yumi olgeta mas i gat na gan bai kamap olsem spia na busnaip bilong yumi.

Dispela taim, gan yumi pret long en bai kamap rabis o nogat wok bilong gan.

Nau yumi pret long gan ya. Wan wan klen o raskol geng tasol i gat. Na em i nupela

samting long komyuniti bilong yumi na yumi kamap olsem kingdam.

Kain kain lo gavman i putim long stopim o bungim gan gen.

Dispela rot bai no inap wok bikos gan ya slip insait long blut tru bilong man na nogat wanpela man bai givim bek gan long gavman. Nogat tru.

Sapos sampela i givim long gavman, wanpela tasol givim long gavman na 9-pela bai haitem na holim long ples. Samting bai hat olsem na isi rot, salim long pablik long liklik prais na olgeta baim.

Skelim gut tingting na sapos yu laik sapatim o agensim, rait tasol long Wantok Niuspepa.

**ROMAN MAWEN
MARGARIMA
SAUTEN HAILANS
PROVINS**

Mi no amamas long ol meri werim trausis

Dia Edita

GIVIM mi liklik spes na mi laik autim liklik wari bilong mi.

Yes, mi save lukim ol meri werim trausis na mi no save amamas o wanbel.

Trausis em bilong ol man na laplap, dres na siket em bilong ol meri. Mi save lukim ol meri werim trausis em i save luk fani long ol.

Na tu dispela graun em graun bilong sin. Meri werim trausis na ol man i save luk aigris long ol.

Em tasol na yu husat meri lukim dispela pas bilong mi long Wantok Niuspepa na yu no amamas o wanbel long pas bilong mi plis yu welkam long bekim.

**KEMIAN PIAHA
GREEN RIVER
SANDAUN PROVINS**



Toksave: Sampela ol pas mipela i kisim i longpela tumas na i no givim spes long ol arapela pas, plis raitim liklik pas. Na tu putim nem na adres bilong yu long olgeta pas yu salim i kam, tenkyu. - Edita

Tok klia, plis

Dia Edita

GIVIM liklik spes tasol na mi raitim hap toktok long harim bilong brata ya, Peter Tilini bilong Lae. Yes Peter, het tok bilong yu em: "Bihainim Lo bilong God tasol."

Peter, taim yumi toktok long Lo, yu mas tok na mekim klia stret wanem Lo em yu toktok long en. Bikos Buk Tambu i pulap tru long Lo bilong God, olsem na taim yu tok Lo, em yu mas tokim klia wanem lo tru em yu laik toktok long en, laka?

Na long ol Baibel sapta na ves yu raitim daun ya, olsem Matt 7:14 na 18:3 na 19:24 na 21:42 na Luk 18:17-27, olgeta dispela ves ya em ol i toktok na sut stret long sait bilong salvesen, long hau yu gen painim laip stap gut oltaim.

Olsem long Matt 7: 14 we i tok long dispela tupela rot, tasol yet, planti ol ai pas yet na ol no lukim rot John 14:6 i tok long en. Na long 19:24 i stori long ol manmeri na tingting tumas long moni na kago na ol aipas long luksave long John 5:24.

Na Peter, yu tok long Aposel 16:12,13 ya, yes, mi lukim olsem nem sabat i stap, tasol dispela ves sapos mi no rong - dispela ves i tok olsem "And on the Sabbath we went out of the city etc..." Dispela ves Aposel Paul i tokaut klia olsem, ol i lusim Koloni bilong Mesadonia na ol i go ausait long siti, na go long riva sait na mekim prea etc...

Tasol wanpela samting Peter, em yu no bin ridim gut dispela ves mi ting. Yu ridim Paul i tok "Long Sabat de ol i lusim ples na ol i go aut long riva sait na mekim beten i stap.

Tasol long trupela Lo bilong God bai yu painim i no tok yu mas go aut long haus bilong yu long sabat de, nogat. Yu mas stap insait long haus tasol inap sabat i pinis long san daun i go long san daun (sunset to sunset).

Skelim dispela ves bilong yu givim mi ya, Aposel 16:12-13 wantaim sabat God i

givim long ol Israel long Exodus 16:29-30.

Na yu tokim mi i gat difrens long dispela tupela ves o nogat? Na tu Peter, inap yu tokim mi wanem em penalty o pei bilong brukim sabat?

Inap yu tokim mi na pablik olsem yu na husat i save kipim sabat de i no bin brukim sabat rul wanpela taim yet?

Long bilip bilong mi yet, long sabat ol Israel i brukim, hau bai yu kipim na no nap long brukim? Exodus 16:24 na tu yu bin tok, dispela Lo i bin kam long Jisas na ol aposel, tasol mi laik yu raitim daun sapta na ves i tok Jisas i kipim na ol aposel tu plis?

Long mi yet mi lukim planti lain we ol save kipim sabat dei, ol brukim dispela dei, ol save raun long kanu go long ples, ol save flai long balus long sabat, ol save kuk long sabat, ol save go soping long sabat, na ol save go raun na piknik long sabat. Yu ting wanem long ol dispela kain lain? Wanem kain panisimen ol mas kisim, yu nap tokim mi?

Na long pinis, Peter, mining tru bilong sabat em wanem? O wanem i tru mining bilong sabat?

Sabat i gat testament God i tokim ol Israel long kipim sabat long mausman Moses i tokim ol, na long nupela testament, husat i tokim yumi long kipim sabat, na husat i mausman long tokim dispela tok?

Mi redi tasol long bekim bilong yu Peter Tilini. Yu tok sabat i stat long Eden i kam long Jisas na aposel - Adam na Iv tupela tu i bin kisim dispela Lo long God? Inap yu raitim Baibel ves i tokim dispela? Tenkyu tumas.

**P.I.
LORENGAU
MANUS PROVINS**

Laikim bekim bilong Praim Minista

Dia Edita

MI WANPELA siaman bilong wanpela koporetiv sosaiti. Wanem samting nau mi laik toktok long en na rait long Wantok Niuspepa em olsem: Mi nau i laik salim wanpela petisen i go long Praim Minista Sir Michael Somare.

Mipela i askim yu nau long dispela gavman bilong yu tude long mipela Yamashuk mipela i save olsem dispela gavman bilong yu ating yu fomim long strong bilong yu o long hatwok bilong memba bilong mipela long Nuku lilektoret.

Sapos yu kamapim dispela gavman long strong na hatwok bilong memba bilong Nuku Andrew Kumbakor bilong wanem na yu nogat tingting long Nuku na yu no nap long sapatim memba bilong Nuku long sampela fanding bilong distrik bilong mipela long ol sampela bikpela projek bilong mipela na nau i wok long bagarap nogut tru.

Olsem wanem, ating Mekere gavman na taim memba bilong Nuku em i stap long gavman na i stap olsem fainens minista ating em i no mas helpim Is Sepik long sampela ol projek bilong yu olsem na nau yu mas bekim dinau.

Sapos em i helpim bisnis bilong ol sampela projek bilong yu i luk olsem ating nau em taim bilong mipela long askim long bekim dinau.

Memba taim em i stap Fainens minista na em helpim yu long silim ta long rot Wewak i go long Maprik mi yet i no save hamas tasol opis bilong memba bilong Nuku i save.

Ol bris bilong yu tu em em i makim mani long en.

Ol hamas ol treseri opis bilong long Is Sepik em tu memba bilong Nuku Andrew Kumbakor i kamapim long taim bilong gavman bilong em.

Em olsem ol tripela bikpela samting tasol em mipela tokaut tasol ol arapela ol samting mipela i no putim.

Olsem na nau mipela i askim long ol bekim bilong yu. Klostu nau na bai mipela i go long 2007 ileksen na mipela i askim yu long wanem yu stap long gutpela posisen long bekim ol askim bilong mipela.

Olsem na dispela Wantok Niuspepa em olsem petisen bilong mipela YAMASHUK. Y em makim Yerwondi, A em makim Apiku, M i makim Mambu, A i makim Aptuwono, S i makim Sulubnuku, H i makim Hambangri, U i makim Ustadu na K i makim Kermbem.

Olgeta 8-pela ples i kamapim dispela Yamashuk Koporetiv Sosaiti. Ol dispela 8-pela ples nau mipela i askim yu gavman bilong tude long helpim long luksave bilong yu.

Mipela nau i askim yu long K900, 000 long ronim sosaiti bilong mipela. Taim yu ritim dispela pepa na yu ting olsem wanem, kontekim mipela long Nuku Distrik Opis o long memba bilong Nuku bai mipela i ken kisim save long wanem bekim bilong dispela petisen o askim.

Tenkyu long ritim bilong yu na olgeta man bilong PNG i ritim dispela Wantok Niuspepa.

**HENRY MANDAL - SIAMAN
NUKU
SANDAUN PROVINS**



WANTOK KOMENTRI

Pipel mas save moa long wok baset

NESENEL gavman i mas kisim luksave long opim wok baset bilong kantri i go aut long pablik.

Bikpela Nesenel Developmen Forum kibung we i stat long Tunde long dispela wok em i wanpela bikpela wok aweanes tru bilong pipel insait long kantri.

Dispela kibung nau i soim klia olsem nesenel gavman i laik tok klia na putim long ai bilong pablik wok em i mekim long makim sindaun bilong kantri long bihain taim.

Minista bilong Fainens na Treseri, Bart Philemon i mas kisim luksave tu long strongpela tingting bilong em long daunim pasin bilong tromoi nating mani.

Olgeta wok em i bin kamapim bihain long em i kisim dispela opis nau i wok long karim kaikai.

Tasol long sait bilong yumi wan wan manmeri, mipela i laik lukim stret kaikai bilong wok. Strong bilong K1 bilong yumi i stap long mak bilong ol samting em i ken baim long stua.

Mipela i no save lukluk long bikpela wok toksave long rot gavman bai bihainim long strongim ikonomi bilong kantri.

Taim prais o mani mak bilong paket rais na tinpis i go antap, bipela i save olsem kantri i bungim taim nogut. Taim K1 i ken baim planti moa samting, kantri i sindaun orait.

Tru tumas, em ol tru tru mak bilong strong bilong ikonomi.

Wok gavman i mekim long kisim tingting bilong ol manmeri long pablik i gutpela moa bikos ol pipel yet bai i ken autim tingting bilong ol na lukim i karim kaikai taim baset bilong kantri i kamap.

Long mun Novemba gavman bai stretim baset bilong 2006 na karim i go long kisim tok orait bilong Nesenel Palamen.

Olgeta wok i kamap pinis na bai i kamap namel long nau na mun Novemba bai skulim ol pipel bilong yumi long wok bilong baset. Arapela samting gavman i mas luksave long en em taim i stap yet we ol i mas pinisim gut Midium Tem Developmen Streteji (MTDS) bilong em.

MTDS em i nem nating. Mipela olgeta bai lukluk long strong bilong gavman, na hat wok bilong ol long stretim olgeta bris na rot, na opim rot bilong ol pipel yet long halivim long strongim mani sindaun bilong kantri.

Sapos bris na rot i stret, infomol sekta i ken kirap moa, ol pikinini i ken go long skul, na sevis i ken go long ples.

Noken pret long sunami

LONG stat bilong dispela yia, bikpela pret i holim Mosbi siti olsem bikpela sunami bai kamap. Dispela i bin kamap long wanem wanpela liklik tokwin i raun na pret bilong sunami i stap strong yet long tingting bilong ol manmeri. Nau Nesenel Disasta Opis na opis bilong was long win, ren na san i wok bung long tok klia long ol pipel olsem dispela wiken bai lukim bikpela drai wara we bai i winim mak bilong dispela i kamap long mun Februari. Bihainim bikpela drai bai mak bilong solwara bipo. Tok lukaut na tok klia tu i go aut pinis.


Bikpela samting em long putim yau long redio na ritim niuspepa. Noken harim tasol tokwin. I gat ol saveman i stap long weda opis.

I go moa neks wik

Sampela pasin lidasip bilong Aposel Simon Pita

Tok i go pas
Luk 5:1ff i stori long Simon Pita na ol arapela wanwok bilong em:- ol lain bilong kisim pis long raun wara Galili. Yumi noken ting olsem Simon Pita na ol lain bilong em long nambis bilong Raun Wara Galili olsem ol em "simpol pisaman". Nogat! Wok bisnis bilong pis em i wankain olsem bilong yumi tude we yumi kolim "pising industri".

wantaim long kisim, maketim pis na wok bilong strongim na sapotim dispela indastri.
Simon Pita em i wok long dispela kain indastri taim Jisas i go long nambis bilong Raun Wara Galili na tokim em long bihainim em na yusim save bilong kisim pis long "pulim ol man".
Fisaris koles
Simon Pita, long wok na save bilong em long kisim na salim pis dispela i lainim em gut tru long pasin bilong kisim, lukautim na maketim pis na tu pasin bilong long sels bilong pis.



Ol prinsipel bilong gutpela lida
wantaim Evangelist
OHARE JABERE

Narapela samting tu, Simon Pita i kisim save long wanem kain pis em i gutpela bilong maket, wanem pis em i gat gutpela marasin na wanem pis em i no gutpela long kaikai o salim.
Simon na ol lain bilong em tu, i save long gutpela taim na taim nogut long kisim pis na ol i save long mekim na stretim umben bilong kisim pis. Dispela kain save i helpim Simon Pita na lain bilong em long mekim pis bisnis i go gut tru. Kain save olsem long nau yumi inap lainim long fisaris koles long Kavieng.

tok tru (Gutnius) olsem na em i no man bilong skelim toktok o em i no man bilong wanbel long bungim na bihainim tok tru na tok giaman wantaim. Pita i no man bilong larim tok giaman long senisim tok tru na pasin i stret. Long Aposel 4:1-20, Peter i tok: "Sapos mitupela i lusim tok tru bilong God na bihainim tok bilong yupela (man) ating em i stret long ai bilong God a? Mitupela i no inap pasim maus. Mitupela i no inap autim tok long olgeta samting mitupela i witnesim (lukim na harim)."
Pasin bilong Fan Reising
Aposel 5:3 i soim olsem Pita i bin man i go pas long dispela. Namba 1 Kristen Fan Reising Wok i bin kamap long Jerusalem. (Aposel 4:32ff) As tingting bilong dispela fan reising em bilong helpim olgeta nupela kristen manmeri long ol i noken hangre o sot na lusim bilip long Gutnius.
Rot ol i bihainim em olsem: "Olgeta kristen bilip manmeri i mas salim ol graun, fam, animol, haus na ol arapela samting na moni ol i kisim long sels o propati em ol mas putim olgeta long lek bilong ol aposel. Ol Aposel i ken tilim na givim long olgeta bilip manmeri.

WANTOK
Published Weekly, Wednesday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: 325 2500
Fax: 325 2579
Email: word@global.net.pg
Pe bilong wanpela yia 52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Neville Choi

Published by Justin Hansu Kili, MBE of Section 58, Allotment 3, Office 2, Waigani Drive.

Word Publishing Company Limited is owned by the four major churches of Papua New Guinea: Catholics 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms and conditions are available at Word Publishing Company Ltd and are set out full on the display advertising form.

Pablik spika
Simon Pita, em i sinia o elda man namel long ol disaipel olsem na pasin bilong toktok long bung bilong ol disaipel o long bung wantaim ol pablik, em i no save sem o pret long opim maus. Em olsem, Simon Pita em i gat strong bilong mekim toktok long pablik. Em i no save wari long wanem kain tok em i mekim o wanem kain tingting arapela bai gat long toktok em i mekim.
Luk 9:20, taim Jisas i askim "ol man tok mi husat?" Pita i hariap tru

Lusim ples...

Ol Indonesia polisman i redi long lusim Aceh provins long Krueng Raya pot, ausait long Banda Aceh. Moa long 700 polisman i pinisim 8-mun wok bilong ol insait long Aceh provins. Gavman bilong Indonesia na ol rebel insait long Aceh provins i sainim wanpela wan bel long stopim pait. Dispela i kirapim



bikpela tingting olsem pait bilong ol we i bin ron inap long 30 kris-mas, bai pinis nau. **REUTERS**



Tren long nait...

OL Ami soldia bilong US husat i stap wantaim 155 Brigid Kombet Tim i wokim trening long nait insait long wanpela Irak Ami Kompaun fairing rens long Forward Operating Bes long Iskandariya. **REUTERS**



Sekim tit..

Wanpela Ami doka bilong Amerika bilong namba 3 Infentri Divisen i sekim tit bilong wanpela as ples meri Irak taim ol i go mekim wok long Baghdad siti long kantri Irak. **REUTERS**



Wokim olsem...


Wanpela sekyuriti man bilong kantri Palestain i soim ol wanwok bilong em long wanpela kain trening klostu long Rafah boda



long Sauten Gaza strip. Ol soldia bilong Palestain bai go sindaun long ol posisen i stap klostu long ol setelmen bilong Israel long redi long lukautim ol dispela hap ples bihain long ol soldia bilong Israel i lusim. **REUTERS**

Wok painim wara...

Wanpela Lockheed Martin Atlas V roket we i karim wanpela spes masin bilong go sekim planet Mars sapos em i gat wara o nogat. **REUTERS**



Resis long wokabaut...

OL dispela man em olgeta i stap insait long wanpela klab ol yet i kolim "The-Lords". Ol save wokabaut brukim ol nambis long kantri Holland. Ol i save putim tumbuna klos bilong ol na wokabaut resis inap long 10 kilomita olgeta. **REUTERS**



FIRE PROOF FILING CABINETS & SAFES

NEW ARRIVAL



Top Price - Top Range

See Our Sales Team.




Port Moresby
Tel: 325 0500. Fax: 325 0302
Lae
Tel: 472 5488. Fax: 472 7838

WOL NIUS WOL NIUS WOL NIUS WOL NIUS WOL



WOL NIUS WOL NIUS WOL NIUS WOL NIUS WOL



Holim strong

Ol boskru bilong wanpela bikpela sip bilong Indonesia, nem bilong em Dewaruci i sanap antap long ol seil taim ol i mekim wanpela wok trening insait long Ijmuiden, wanpela solwara pot long noten hap bilong kantri Netherlands. Moa long 600 sip i bin kamap long Amsterdam long Trinde long dispela wik. Dispela samting i save kamap olgeta 5-pela yia na i save pulim 57 longpela sip i kam long olgeta hap long wol. Samting olsem 2.5 millien pipel bai kam lukim ol dispela sip.
REUTERS/Michael Kooren



Sekin bun

WANPELA reskiu wok man i sekim bun bilong wanpela bikpela Wes Karibien Eweis MD-82 balus long Machiques, insait long kantri Venezuela. Dispela balus we i wok long karim ol turis i go long ples Panama i bin painim birua long Tunde long dispela wik na pundaun kilim olgeta 160 manmeri i stap insait. Ol saveman i tok ol ensin bilong balus i bin indai na pundaun i kam daun.



Ol naispela han

TUPELA yangpela meri bilong ples Mauritania i soim han bilong ol i gat ol stail tatu samting long en.



Lusim ples

Ol setelmen lain bilong Israel i krai taim ol i pait wantaim ol soldia na polis long Neve Dekalim setelmen long Gaza strip. Ol sekyuriti fos i bin go insait long ol setelmen na tokim ol manmeri long lusim dispela ples pastaim long 12 kilok moning.



Bikhet long Brasil

WANPELA sumatin bilong kantri Brasil i kalap i go insait long wanpela raun wara i stap ausait long Nesenel Kongres long Brasil long tokaut agensim pasin korapsen na ol iekonomik polisi bilong gavman long Tuade.

Ol Amerika raun painim kangal bilong Papua



Redi long statim raun: Michele Westmorland na Karen Huntt, tupela meri antropolojis i redi long bihainim lek mak bilong Caroline Mytinger.

LONG tupela wik i kam, GLASIM MUSIK bai bringim yu ol stori bilong wanpela bikpela raun painim we i bin stat long 1920 yet taim tupela meri Amerika bilong penim ol piksa i bin raunim Saut Pasifik na penim piksa bilong ol pipel, laip-stail bilong ol na ol pasin tumbuna bilong ol we pasin bilong waitman i bin bagarapim.

Long mun Jun long dispela yia, tupela meri antropolojis (save lain bilong glasim laip na sindaun bilong ol pipel) bilong Amerika i bin raun i go long Solomon Ailans na kam long PNG we ol i painim ol tumbuna bilong ol lain manmeri bilong bipo yet we pes bilong ol em dispela meri Amerika bilong bipo yet i bin penim. Nem bilong dispela meri em Caroline Mytinger. Em i bin kam long PNG na Solomon Ailans klostu 80 krismas i go pinis long painim ol pasin tumbuna bilong dispela tupela ples. Em i bin laikim tru kalsa bilong ol Pasifik pipel.

Tupela meri antropolojis husat i bihainim lek mak bilong Caroline Mytinger tude em Michele Westmorland na Karen Huntt. Tupela i raun wantaim wanpela film kru na ol arapela kain kain masin long kisim stori na piksa bilong ol kalsa bilong ol as ples manmeri bihainim wokabaut bilong Mytinger.

Mytinger yet i bin raun long dispela tupela Pasifik kantri "long penim piksa bilong ol as ples manmeri pastaim long pasin bilong waitman i bagarapim ol olgeta".

MV Febrina

Raun bilong Michele na Karen we inapim stret tupela mun em ol i kolim Headhunt Revisited. Tupela i mekim dispela raun long wanpela bot MV FEBRINA we i bin lusim Simpson Haba long Rabaul, i abrusim Bogenvil na i go olgeta long Solomon Ailans bihainim ron bilong Caroline long 1926 na 1927 namel long PNG na Solomons.

Caroline Mytinger na poroman bilong em, Margaret Warner i bin statim 4-pela krismas raun bilong ol long Pasifik long mun Mas 1926 long wanpela bikpela sip long San Francisco i go long PNG na Solomon Ailans.

Tupela i no bin i gat sponsa na mani mak bilong ol inap long 600 Amerika dola na ol tin pen.

Tupela i bin go pas long ol arapela wait meri long raun i go long ol ples we ol wait man tasol i wok misiniari, lukautim ol plantesen na wan wan i save raun painim ol nupela ples.

Tasol Caroline yet i bin laik mekim dispela raun long wanem em i luk-save long bikpela senis kolonais-esen i ken kamapim long laip bilong ol as ples pipel bilong Pasifik.

Bikpela as tingting bilong en em long rekodim olgeta pasin tumbuna pastaim long pasin bilong waitman i kam na bagarapim.



Caroline Mytinger: Meri husat i penim ol piksa bilong PNG na Solomon Ailans namel long 1926 na 1927

Stori bilong tupela krismas raun bilong em long PNG na Solomon Ailans namel long ol as ples manmeri i stap insait long tupela buk em i bin raitim, Headhunting in the Solomon Islands, na New Guinea Headhunt. Tupela buk wantaim i bin kamaut long 1940s.

Sik na pasin nogut

Caroline i bin stori insait long buk bilong em New Guinea Headhunt, "It has been found that the decline in primitive populations which inevitably follows the coming of the white men to their countries is not always caused by diseases or abuse alone.

There is also a mysterious disintegration of the spirit, a weakening of the will-to-live that gives microbes and bullying a fallow soil to fall on. One cause for this.....is too abrupt a transition from the old culture to an entirely different new one; from the rich old beliefs and exciting customs to comparatively cacuous new activities".

(Mipela i painimaut olsem daunim bilong namba bilong ol as ples manmeri i save kamap bihainim long ol waitman i kamap long kantri tasol i no save kamap long sik na pasin nogut tasol. I gat wanpela kain pasin we spirit bilong ol i save dai na ol i save les long stap laip. Wanpela bikpela as bilong dispela em bikpela

senis long sotpela taim long pasin tumbuna i go kamap long wanpela nupela kain kalsa; we ol i lusim ol tumbuna bilip bilong ol na putim ai long ol nupela pasin.")

Bihainim long tupela i bin go bek long Amerika long 1930s, ol penting bilong Caroline i bin go sindaun long Ameriken Musium ov Netserel Histori long Nu York, aninit long lukaut bilong antropolojis Margaret Mead, husat i bin wanpela bikmeri long stori bilong PNG tu.

Bikpela driman bilong Michele na Karen

Na bihainim long ol dispela penting i bin go aut long ol arapela ples long Amerika, Caroline Mytinger i bin givim 23 long ol i go long Phoebe Hearst Musium o Antropoloji long Berkeley, Kalifonia we ol i bin hait i stap inap nau.

Stat long taim em i bin kisim wanpela kopi bilong buk bilong Caroline Mytinger, New Guinea Headhunt long poroman bilong mama bilong em, Michele Westmorland i bin strongim tingting bilong em long bihainim dispela stori. Em nau dispela raun Headhunt Revisited i bin kamap olsem Mytinger Projek, wanpela bikpela driman bilong Michele na Karen.

"Yu bai laikim dispela buk tru, long wanem mi ting hap pasin bilong Caroline em yu kisim," dispela meri i bin tok pastaim long em i dai.

Michele i bin mekim bikpela wok risets na painimaut na em i bin haiarim tu ol man bilong mekim wok painimaut long painim ol dispela penting bilong Caroline i bin penim na i go igo na em i painim 23 we i bin kamap long wanpela websait.


Dairekta bilong Monterey Musium ov At i bin tokim Michele olsem em i holim tu sampela long ol liklik buk bilong Caroline. Dispela em 4-pela bikpela buk we ol i karamapim wantaim tapa na i gat ol poto, ol pas, na ol arapela samting we Caroline i bin bungim taim em i bin raun long PNG na Solomon Ailans. Taim Michele i kisim ol dispela samting, em i luk-save olsem dispela wok painimaut bilong em bai karim kaikai.

Dispela raun bilong em nau em ol i bin laik kamapim wanpela buk, ol stori, wanpela film na wanpela eksibit webai i raun na soim ol poto na penting bilong Caroline. Ol i bin laik kisim ol piksa bilong laip bilong ol pipel tete.

Michele Westmorland na Karen Huntt i bin lusim Rabaul long namel long mun Me wantaim filim kru bilong ol, kapten bilong sip, wanpela as ples save man bilong Vitu Ailan, Wes Nu Briten, wanpela lokal antropolojis.

Glasim Musik bai bihainim stori bilong raun bilong ol insait long PNG na i go olsem long Panapompom Ailan long DeBoyne Grup i trip long saut is hap bilong Solomon Ailans.

"Long Fonde mipela i painimaut moa long dispela ailan



Painim Skal Kev: Karen na Michele i sanap insait long hul long ston we i putap wantaim ol skal o bun bilong het i stap long Hiliwao Viles long Is Keip.

Panapompom taim mipela i raun painimaut moa long dispela penting "lomai man i save sapim solwara kanu", em Headhunt Revisited websait i bin stori.

Ol meri i bin laik go lukim ol masta man bilong sapim kantu bilong Panapompom we pasin bilong sapim kanu em ol i save givim long brata bilong mama i go daun long liklik ankol tasol.

"Mipela i bin toktok wantaim Onismo long Galowesan o Howaguma. Onismo em i tumbuna bilong lomai, man husat ol mak long skin bilong em em Caroline Mytinger i bin penim taim em i raun long ol dispela ailan."

Yela Ailan (Rossel Ailan)

lomai i bin wok long wanpela kokonas plantesen long Panasesa we Caroline i bin lukim em bipo tru, na long hia, wanpela blupela raun wara long arapela sait bilong ailan we Michele na Karen i bin sanap insait long wara taim wanpela bikpela jeli pis i kam na paitim lek bilong Karen na raunim lek bilong Michele.

Long Yela Ailan (Rossel Ailan) MV FeBrina i bin anga long wara we 60 kilomita samting rip i raunim. Na long fran bilong ol em Wola o Wull, wanpela liklik ailan we ren i no isi long pundaun long en.

Ol i go sua na ol i bungim ol lain manmeri i stap long dispel ailan. Insait long buk bilong em New Guinea Headhunt Caroline i stori long ol dispela lain olsem ol strong-pela paitman, tasol ol lain i kam bungim ol em ol gutpela lain. Caroline i bin penim "Yela Fisherman", piksa bilong pes na ol i bin laik painim wanpela tumbuna bilong dispela pisaman i stap yet long ailan ya. Tasol i no bin i gat.

Em nau ol i go olgeta long Darmeru ples i stap long ples tais we Caroline i bin stori long en. Ol i soim piksa bilong Yela Fisherman long ol

as ples manmeri na ol i kirap nogut long painim tumbuna meri pikinini bilong dispela man insait long penting, nem bilong dispela meri em Daisy. Na pes bilong em i wankain tru olsem tumbuna man bilong em. Ol ples lain i lukim piksa bilong Yela Fisherman na ol i luksave long em stret.

Karen i bin kisim bagarap long han sut bilong em taim em i bin pundaun taim ol i wokabaut raunim Wuli Ailan. Tupela poroman i bin kisim ol kain kain hevi, tasol ol i no wari. Ol i go het yet wantaim raun bilong ol.

Long Fraide 20, Me, MV FEBRINA i sua long Hoiia Bei long not bilong Is Keip na em i anga long Tawali. Long dispela hap, ol i go lukim ol skal kev bilong Hiliwao Viles. Insait long ol dispela hul long ston i gat ol bun bilong ol het i stap long hap long bipo yet.

"Tasol i bagarap long wanem ol as ples i tus tingting long stori bilong ol dispela ples, o ol i les long tokim mipela," websait i stori. "I nogat wanpela manmeri i bin inap long stori long mipela."

Long apinun, ol i brukim bikpela ren long raun i go long wanpela skol long Wogohuhu we ol i mekim liklik donesen i go long ol tisa na soim ol piksa bilong ol penting bilong Caroline na ol arapela piksa bilong ol ples na ol pipel na tok klia long wok bilong raun bilong ol.

Em i gutpela tru na ol karim laptop kompyuta masin bilong ol long wanem ol tisa na sumatin bilong Wogohuhu i bin lukim wanpela kain masin olsem bipo.

Ol pikinini i tok tenkyu long ol na singsing PNG nesanel singsing we i sutim stret lewa bilong ol lain i mekim dispela raun.

Neks wik bai mipela i stori moa long dispela bikpela raun we bai i go painim Samarai Ailan.

Yu ken ridim ol stori blong Musik olgeta Mande insait tasol long The National

Raun wantaim Kanage olgeta wik

EMTV GAID

Table with 3 columns: Time, Program, Channel. Includes programs like STATION OPEN, JOYCE MEYER, NATIONAL NINE NEWS, etc.

Table with 3 columns: Time, Program, Channel. Includes programs like STATION OPEN, JOYCE MEYER, NATIONAL NINE NEWS, etc.

Table with 3 columns: Time, Program, Channel. Includes programs like PLANET FANTA, PIGS' BREAKFAST, SCHOOL BOYS RUGBY LEAGUE, etc.



KANAGE GO LUKIM SHARZI SING SING LONG KOKOPO... OL MERI LONG HAP I LONG LONG NA SINGAUT LONG SHARZI LONG KAM DAUN...

OL MERI ILAIK SHARZI I KAM DAUN NA OL I HOLIM EM, TASOL NOGAT, SHARZI EM KALAP I GO DAUN... TAIM OL MERI ILUKIM OLSEM SHARZI I KALAP, OLGETA I TEK-OFF...

AEE! EM BAI FLETIM YUMI YAH!! SHARZI EM TRAIPELA MAN TU YAH...

SHARZI EM LAKI TRU, BIKOS KANAGE I STAP NAME LONG OL MERI I KETSIM EM... HAA MAIBRO KANAGE!! YUGAT MOA STRONG YA NO MOA!!

YUMI FM NATIONAL WEEKLY HITPARADE Sarere Ogas 20, 2005

Table with 3 columns: Singing, Musik Atis, Dispela Wik. Lists songs and artists like Twin Hoks of Kavieng, Leonard ft Anslom, Sebeats of Sepoe, etc.

CATHOLIC RADIO 103.5 FM

Table with 3 columns: Time, Program, Channel. Includes programs like ANGELUS, MEDITATION/INSPIRATIONAL MUSIC, VATICAN RADIO WORLD NEWS, etc.

Table with 3 columns: Time, Program, Channel. Includes programs like ANGELUS, MEDITATION/INSPIRATIONAL MUSIC, VATICAN RADIO WORLD NEWS, etc.

Table with 3 columns: Time, Program, Channel. Includes programs like ANGELUS, MEDITATION/INSPIRATIONAL MUSIC, VATICAN RADIO WORLD NEWS, etc.

Table with 3 columns: Time, Program, Channel. Includes programs like ANGELUS, MEDITATION/INSPIRATIONAL MUSIC, VATICAN RADIO WORLD NEWS, etc.



Laikim Penpren

Nem: Lesie Mogola
 Krismas: 16 (man)
 Adres: Margarima High School, PO Box 33, Mendi, Southern Highlands Province
 Save laikim: Pilai spot, wokim skul wok, tok pilai wantaim ol pren na raitim pas.

Nem: Mishelly Damien
 Krismas: 16 (meri)
 Adres: Sol Primary School, PO Box 643, Mendi, Southern Highlands province
 Save laikim: Swiming, wokim bilum na raitim pas.

Nem: Vincent Gedix
 Krismas: 17 (man)
 Adres: Gabensis Primary School, PO Box 315, Lae, Morobe Province
 Save laikim: Pilai spot, harim musik, raun wantaim ol pren na salim pas.

Nem: Silas Benny
 Krismas: 18 (man)
 Adres: Andakombi Community School, PO Box 240, Goroka, Eastern Highlands Province
 Save laikim: Pilai spot, go lotu na pilai gita na piano.

Nem: Nelson Yivaton
 Krismas: 19 (man)
 Adres: Aitape Vocational School, PO Box 34, Aitape, Sandaun Province
 Save laikim: Harim musik, pilai gita, pilai tas na raun long bus wantaim ol pren.

Nem: Leticia A. Benson
 Krimas: 24 (meri)
 Adres: PO Box 1502, Jerusalem Street, Cape Coast '2', Ghana, West Africa.
 Save laikim: Mekim pren, raun, harim musik, senisim presen na poto.

Nem: Oberth Kitumbing
 Krismas: 17 (man)
 Adres: Bema Provincial High School, PMB Lae Post Office, Morobe Province
 Save laikim: Wok long gaden, pilai soka na harim nius long radio.

Nem: Mary Louisa Sau
 Krismas: 17 (meri)
 Adres: Mercy Secondary School, PO Box 580, Wewak, East Sepik Province
 Save laikim: Stori, raitim pas, pilai spot na tok pilai.

Nem: Stephanie Mava
 Krismas: 17 (meri)
 Adres: C/- Gavien Church, PO Box 175, Wewak, East Sepik Province
 Save laikim: Kukim kaikai, tok pilai na pilai volibal.

Nem: Julian Dobb Harry
 Krismas: 16 (meri)
 Adres: PO Box 1160, Goroka, Eastern Highlands province.
 Save laikim: Harim musik, raitim pas, pilai volibal, go long lotu na sensim poto.




STORI TUMBUNA

**MAN MARITIM
 PIS MERI**

WANPELA taim wanpela yangpela man i bihainim bikpela wara i go antap long bus.

Em i go i go nau na em i lukim wanpela naispela, yangpela meri tru. Tasol em i no meri tru, em i pis, em i pis, tanim olsem meri. Em i stap antap long ston na wok long wokim bilum i stap. Man ya i lukim dispela meri na em i seksek tru long em na i tok, ha, ha, nau bai mi go holim pasim dispela meri na karim em i go long ples. Bai mi maritim em. Em i tok olsem na hait gu tru na i go antap isi, isi. Pis meri antap long ston ya i lukim em nau, em i lusim bilum bilong em antap long ston, tanim olsem pis na kalap i go bek long wara. Nau man ya i kros nogut tru na i belhat wantaim i go bek long ples bilong em. Bilum bilong pis meri ya, em i bin kisim. Dispela bilum i naispela bilum tru olsem na man ya i ting olsem em i no ken soim ol bilum bilong pis meri ya, nogut em i tokim ol stori bilong em na bai ol i go stilim meri bilong em. Em i no tokim ol pren na brata bilong em long dispela stori.

Long neks moning em i lusim tingting na i laik go long gaden bilong em tasol em i lukim bilum gen na i tok, maski gaden, bai mi go daun long



wara na lukim pismeri bilong mi. Taim em i go antap bihainim wara dispela tingting bilong holim pasim meri ya i kamap gen long em olsem na em i tok bai mi go kwiktaim tru na hait i stap klostu tru long we em i save wokim bilum bilong em, na bai mi holimpasim em.

Nau em i ran kwik i go hait arere tru long ston we dispela meri i save wokim bilum long en. Man ya, i nogat nois tru na hait i stap, lukluk i go daun na i go antap long wara. Taim em i lukluk i stap wanpela bikpela pis tru i kalap i go antap long wesana na kwiktaim tru em i

tanim olsem wanpela naispela yangpela meri. Em i go antap long ston we man ya i hait i stap long en. Oloboi, man ya i no wet moa, em kwiktaim tru holimpasim dispela meri. Trangu meri ya i singaut nogut tru na i wok long tok, lusim mi, lusim mi, mi no meri mi pis bilong wara, nogut yu kilim mi.

Man ya i tok, nogat, yu meri bilong mi. Mi lukim pes, han, gras, lek na susu bilong yu na mi wari, plis, mi no inap kilim yu o bagarapim yu. Olsem na plis, bai mi maritim yu. Plis tok stret na bai mi bringim yu go long ples. Tupela i toktok

wantaim i go i go inap maus bilong i pen nogut tru. Klostu tudak nau na meri i sori long man ya na em i tok, man bilong mi sapos yu laikim mi tru orait taim yu kisim mi i go long maritim mi, yum as no ken bringim mi klostu o arere long wara. Sapos yu no harim tok bai yu sori na kraik long mi. Nau man ya i tok em i harim na i save pinis.

Nau tupela i amamas nogut tru na tupela i go long ples we tupela i marit na i stap hepi wantaim.

Stori i kam long Madang provins

Mi wanpela sumatin i gat wari na mi laikim helpim.

Dia laiplain
DISPELA em i laspela yla bilong mi long halskul. Mi bin taitim tumas bun long skul na mi laikim bai mi painim wok taim mi pinisim skul. Tasol tisa i save tokim mipela olsem sampela bilong mipela bai i no inap painim wok.

Na dispela i mekim mi bel kaksas tru. Bilong wanem mi mas taitim bun na brukim het long skul sapos bihain mi noken painim wok?

Na mi mas go bek tasol na sindaun nating long ples? Inap yu ken tokim mi mas mekim wanem samting bai mi ken painim wok bihain mi pinisim skul pinis?

WORRIED STUDENT

Dia Pren
 Ating oltaim yu bin ting olsem yu go long skul bilong kisim wok long taun. Nau yu bin painimaut olsem i nogat wok na yu bel kaksas.

Tasol pren, tisa bilong yu i bin tok tru. I nogat wok long olgeta sumatin i winim skul.



Sapos yu strong long kisim wok long taun, orait, nau yu mas taitim bun tru long kisim gutpela mak tru.

Tasol moabeta yu sindaun tingting pastaim. Sapos yu no inap kisim gutpela wok long taun na winim mani, em i no min olsem yu no inap long mekim arapela kain wok. Nogat. Em i no min olsem save bilong yu i tus nating, nogat.

Mi wari long yu. Yu bin rait olsem, Bai yu mas go bek long ples na sindaun nating. Bilong wanem sindaun nating?

I gat planti gutpela samting yu inap wokim long ples. Kantri bilong yumi i mas gat planti saveman i gat laik long go bek long ples na yusim gutpela save bilong ol bilong helpim ol wantok na wanlain

long kisim gutpela sindaun.

Papamama bilong i bin kisim save long papamama bilong ol.

Long ples, i gat planti save i no stap insait long ol buk. Na ol boi na ol meri i ronawe i go long taun, ol i tromoim ol dispela save bilong ol tumbuna.

Sapos yu sindaun i stap long ples, yu inap long kisim gut ol dispela save bilong bipo.

Sapos yu skul pinis na go bek sindaun long ples, yu inap bringim olgeta gutpela save bilong yu i kam insait long ples. Yu ken kisim mo0a save tu long ol didiman na helt opisa na bisnis opisa.

Yupela manmeri i bin winim skul, yupela inap bringim planti nupela samting i kamap long ples.

Bringim wara i kamap long ples. Groim ol nupela kaikai bilong salim long maket. Ranim ol tretstoa. Skulim pipel long ol we bilong abrusim sik. Yes, i tru.

Ol dispela bai i putim sampela kina long poket bilong yu

olgeta potnait. Tasol yu mekim gutpela samting tru bilong helpim yu na dispela kantri tu.

Olsem na yu no bel hevi sapos yu no inap painim wok long taun. Yu noken ting ol wok skul bilong yu i lus nating, nogat.

Yu mas tingting olsem, " Mi mas taitim bun nau long skul. Na bihain, mi laik yusim save bilong mi long olgeta hap-long taun o long ples. Save bilong mi i mas helpim narapela man, maski em i stap we.

LAIPLAIN.

Sapos yu gat wari o hevi, rait i kam long Lifeline, P O Box 6047, Boroko, NCD. Yu ken ringim mipela tu long telpon namba 3260011. Raitim trupela nem na etres bilong yu i kam na bai mipela i salim bekim long pas bilong yu.

Mipela bai toktok long ol trupela samting yu askim long em tasol bai mipela i no inap long putim trupela nem bilong yu.



Bisnis bilong Groim Diwai
Insait long PNG
- Planim diwai long
ol renfores eria

Rot bilong groim ol spisis diwai i save groa insait long PNG

Anisoptera thurifera

Nem bilong en: mersawa, anisoptera

Ples we em i save groa: Mersawa i gat 11-pela kain spisis na i save groa long kantri Banglades i go olsem long Is long Tailen, Vietnam na i go olgeta long kantri Malaysia na Papua Niugini. Long PNG, em i save groa moa long Westen, Galp, Sentrel, Morobe, Milen Be, Oro na sampela long Is Sepik.




long ples klia.

Mersawa i save groa insait long ol evagrin na evagrin dipterokap fores, na moa long ol hap i stap daunbilo long 1000 mita mak bilong solwara o ol i save groa long ol liklik grup insait long ol fores i stap klostu long nambis. Dispela spisis i save groa long ol graun i no save holim wara tasol em i ken groa gut tu long sodas o ples tais.

Wanem kain diwai: Mersawa em i save groa long midium i go bikpela diwai longpela bilong em i ken inap long 60 mita. Bikpela han diwai bilong em i nogat arapela liklik han diwai i go inap 25 mita na em i save groa inap 2 mita long namel. Skin diwai bilong i ken groa inap 2cm, ausait skin bilong em i grei braun i go ret braun. Namba tu skin bilong em i grin na braun na namba tri skin bilong em i stap insait tru em i tait braun. Longpela bilong ol lip bilong em i hame long 6 na 18cm.

Timba i no strong taim em i pundaun long graun. Ol waitpela anis i ken kaikaim na bagarapim na i gat ol arapela binating i ken bagarapim. Namel bilong diwai bilong em i yelo braun, na i save tanim i go kala bilong rous. Timba i save senis kala taim em i stap



Taim bilong em long flaua na karim pikinini: Mersawa i save karim flaua na prut olgeta yia, tasol sapos taim bilong bagarap, plaua i no inap kamap. Ol switpela flaua i save kamap long Oomsis long Morobe provins namel long mun Novemba na Desemba na pikinini i save pundaun namel long mun Me. Yu ken kisim pikinini diwai long graun o yu ken kalap i go enlap na kisim long diwai stret. Bihain long yu bungim ol prut, yu ken tarim i stap wantaim hap han diwai long en. Em i gutpela long planim ol prut bihain long yu bungim ol long wanem di pikinini diwai i no inap stap strong long taim.

Yu ken yusim: Timba bilong en yu ken yusim long mekim ol samting olsem dua, ol windua frem, plua na ol panel bilong insait long haus. Em i Is long katim wantaim so, tasol wara bilong em i ken pinisim sap bilong so. Yu ken abrusim dispela hevi sapos yu yusim gutpela diwai, na strongim ol tit bilong so bilong yu.

Yu ken rausim skin diwai bilong em na yusim olsem plaiwut.

Long sampela hap, ol i save kaikai nat bilong mersawa, we i pulap wantaim ol kain kain naispela wel bilong kaikai bihain long yu kukim. Gam bilong em yu ken kaikai olsem PK.

Rot bilong groim: Sid i save ku taim prut i stap long diwai yet. Yu ken groim ol sid wantaim ol wing namel long 18 na 35 de bilong kru gut. Brukim skin bilong sid yu mas mekim 3-4 de bihain long em i stat long kru. Ol sidling bai redi long planim namel long 25 na 35 de bihain long yu brukim skin bilong em.

McCarthy & Associates (Forestry) Pty. Ltd.
National & International Forest Consultants
mccaf@datec.net.pg

"Long kisim tok stia long olgeta wok diwai"

Yam na taro bilong Kabwum i gat namba

James Kila i raitim

SAPOS yu wanpela nupela man i lukim sais bilong ol yam bilong ples Kopa insait long Kabwum distrik long Morobe provins, em bai yu no inap bilip stret.

Dispela ol yam ol ples lain yet i planim i bikpela tru. Planti ol yam ya i hevi tru na sapos yu wanpela tasol i apim em masol bilong yu bai pen stret. Ating sapos yu kaikai planti na sapos yu laik traim apim dispela ol yam yu wanpela yet ating bai yu taitim bun stret ya.

Dispela ol kain kain tumbuna yam bilong ples Kopa bilong lonsing bilong Kogala Koporetiv Sosaiti long ples Kopa. Moa long 5,000 manmeri i bin kapsait stret long ples Kopa long lukim dispela lonsing seremoni.

Ol manmeri i bin pulap tru bikos ol i ting olsem Praim Minista Sir Michael Somare wantaim Agrikalsa Minista Mathew Siune bai na

bungim ol. Tasol raun bilong dispela tupela lida i bin bagarap liklik bikos bikpela ren na klaut i bin pasim rot na tupela wantaim pailot bilong helikopta i tanim bek.

Tasol ol pipel i no wari tumas bikos wanpela bikman tu i stap na i kisim ples bilong Praim Minista Sir Michael Somare na Mista Siune long opim dispela koporetiv.

Ol manmeri i amamas tru long harim toktok bilong Sief Eksekyutiv Opisa bilong Kopi Industri Koporesin (CIC) Ricky Mitio i katim wanpela keik long makim lonsing bilong Kosala Koporetiv Sosaiti. Lokol memba bilong Kabwum, Bob Dadae tu i bin stap long givim toktok na sapot bilong em long Kosala Koporetiv Sosaiti.

Mista Dadae, husat em Deputi Spika bilong Nesenei Palamen wantaim Mista Mitio i bin opim ai bilong ol stret taim ol komiti bilong Kosala Koporetiv

Sosaiti i kisim ol long lukim ol gaden kaikai ol i soim long ol pablik long lukim.

Tru tumas sais bilong ol dispela yam i bikpela tru. Hevi bilong ol yam tu i bikpela na ol lain pipel i sanapim ol hap diwai long sait sait bilong yam long ol pipel husat i go long lonsing long lukim. Mista Bob Dadae i tok olsem yam bilong Kabwum i kirapim bel na tingting bilong em long kamapim wanpela 'Kabwum Yam Fesitival'.

Mausman bilong Kosala Koporetiv Sosaiti na man husat i go pas long kirapim wok long helpim ol pipel bilong em insait long ol bus ples, Kine Mufuape i tok olsem dispela ol gaden kaikai ol ples manmeri long Kopa na ol arapela ples long Kabwum eria i planim em wankain olsem ol tumbuna bipo yet i save mekim.

Nau yet Nesenei Agrikalsa Risets Institut (NARI) i wok long mekim kain kain stadi o

wok glasim long ol nupela gaden kaikai ol i bungim i kam long ovasis.

Mista Muruape i tok em i gutpela moa sapos ol lain long NARI i go na skelim gut save wantaim ol lain pipel bilong ples pastaim na kamap wantaim ol stadi bilong ol.

Ating save bilong ol lain long ples i moa gutpela na winim save bilong ol bikpela skul manmeri bikos ol i save gut long graun, rot bilong planim yam na wanem gutpela taim long plantim ol yam na kamautim long graun.

Wantok Niuspepa i bin stap wanpela wik long ples Kopa long Kabwum na i lukim ol lain i skelim hevi bilong ol dispela yam. Tru tumas, hevi bilong wanpela yam we pes bilong em i olsem man i silip na tromoi han lek em 47 kilogram.


Narapela bikpela yam tu ol i skel em hevi bilong em i sanap olsem 42 kilogram.



I NO YAM YA! Ol pipel bilong Kopa i soim strong bilong ol yam bilong Kabwum.

Cat® CS-563E CP-563E

Vibratory Soil Compactors



Designed to provide...
Outstanding Performance, Reliability and Fuel Efficiency.

The 563E Series Compactors are high production units. Standard dual amplitude, changeable from the operator's station, expands the application range. Operate in high amplitude to get density on thick lifts in the fewest passes. Select low amplitude when operating next to structures, when approaching final density, or to avoid fracturing aggregates. Patented eccentric weight design assures positive amplitude selection and helps extend vibratory system service life.

Hastings Deering



PORT MORESBY
Spring Garden Road, Hohola, PNG
Ph: (675) 300 8300 - Fax: (675) 325 0141

	PHONE	FAX
LAE	472 2355	472 1477
TABUBIL	548 9162	548 9155
RABAUL	982 1244	982 1129
LHIR	986 4105	986 4107
KIMBE	983 5144	983 5144

Product People Commitment.
We deliver.



RADIO TOK PISIN PROGRAM	
TUNE IN: 101.9 FM	
Radio Australia Tok Pisin Program - stat long mun Mas 2005	
MANDE Moring	
6AM	Stesen Op - Nius Hettain - Musik na ol intaviu
6.30AM	Nius na Karent Afeas
7AM	Stesen Pas
Nait	
7PM	Stesen Op
7.01PM	Ol Hettain na Program Priviu
7.15PM	Spots
7.30PM	Nius na Karent Afeas
8PM	Hett
8.15PM	Musik
8.30PM	NIUS
8.40PM	Spots Riplei
8.55PM	Musik
9PM	Stesen Pas
TUNDE Moring	
6AM	Stesen Op - Nius Hettain - Musik na ol intaviu
6.30AM	Nius na Karent Afeas
7AM	Stesen Pas
Nait	
7PM	Stesen Op
7.01PM	Ol Hettain na Program Priviu
7.15PM	Musik na Chit-Chat
7.30PM	Nius na Karent Afeas
8PM	Mama Graun
8.15PM	Musik/Spots
8.30PM	NIUS
8.40PM	Hett Riplei
8.55PM	Musik
9PM	Stesen Pas
TRINDE Moring	
6AM	Stesen Op - Nius Hettain - Musik na ol intaviu
6.30AM	Nius na Karent Afeas
7AM	Stesen Pas
Nait	
7PM	Stesen Op
7.01PM	Ol Hettain na Program Priviu
7.15PM	Musik na Chit-Chat
7.30PM	Nius na Karent Afeas
8PM	Focus
8.15PM	Musik/Spots
8.30PM	NIUS
8.40PM	Mama Graun Riplei
8.55PM	Musik
9PM	Stesen Pas
FONDE Moring	
6AM	Stesen Op - Nius Hettain - Musik na ol intaviu
6.30AM	Nius na Karent Afeas
7AM	Stesen Pas
Nait	
7PM	Stesen Op
7.01PM	Ol Hettain na Program Priviu
7.15PM	Musik na Chit-Chat
7.30PM	Nius na Karent Afeas
8PM	Youth
8.15PM	Musik/Spots
8.30PM	NIUS
8.40PM	Focus Riplei
8.55PM	Musik
9PM	Stesen Pas
FRAUDE Moring	
6AM	Stesen Op - Nius Hettain - Musik na ol intaviu
6.30AM	Nius na Karent Afeas
7AM	Stesen Pas
Nait	
7PM	Stesen Op
7.01PM	Ol Hettain na Program Priviu
7.15PM	Musik na Chit-Chat
7.30PM	Nius na Karent Afeas
8PM	Wantok
8.15PM	Musik
8.30PM	NIUS
8.40PM	Youth Riplei
8.55PM	Musik
9PM	Stesen Pas
SARERE Nait	
7PM	Stesen op - Ol Nius Hettain/Program Priviu
7.05PM	Musik na Chit Chat
7.30PM	Nius
7.40PM	Wantok
8PM	Lokal Ben
8.30PM	Nius
8.40PM	Musik/Chit Chat
9PM	Stesen Pas
SANDE Nait	
7PM	Stesen op - Ol Nius Hettain/Program Priviu
7.05PM	Musik na Chit Chat
7.30PM	Nius
7.40PM	Femii Blong Serah (Radio Plet)
8PM	Lukluk Bek Long Wik
8.30PM	Nius
8.40PM	Musik/Chit Chat
9PM	Stesen Pas

TOKSAVE: YU KEN HARIM RADIO AUSTRALIA TOK INGLIS LONG 24 AUA 7 DE LONG WAN WIK

PASIFIK NA WOL NIUS

Ol wan famili bilong ol lain i dai long balus biruai kamap long Greece

OL SORE lain famili bilong 121 pasindia husat i bin indai long wanpela balus birua i go kamap pinis long kantri Greece bilong luksave long ol wan famili bilong ol husat i bin indai.

Helena Smith husat i stap long bik siti bilong Greece i tok ol i bin kisim ol famili i go long mog o

bikpela ais bokis bilong putim dai bodi na kampani i papa long Cypriot elains, Helios i bin pasim olgeta ron bilong ol arapela tripela balus bilong en.

Ol famili memba i bin kraik wantaim na go kamap long mog na i luk olsem planti bilong ol bai painim hat long luksave long ol wanfamili bilong ol i dai long en long wanem planti bilong ol em paia i kukim na bagarapim bodi bilong ol nogut olgeta. Na ol arapela bodi em ol i bin bruk bruk i go long ol liklik hap.

Ol i tok samting olsem tripela ten (30) bilong ol dispela lain i dai long en bai i hat long ol i luksave long ol husat husat, na i luk olsem bai kisim longpela taim long ol i painimaut - pastaim long DNA tes i tokaut stret long dispela 121 pipel i bin indai long en. Dispela Praivet Cypriot opereta Helios i bin pasim ron bilong ol balus bilong en - bihainim ol protes olsem sampela long ol balus bilong en i bin wok long bungim birua - wankain olsem dispela i pundaun na kilim ol pipel long en insait long Greece.

Indonesia gavman sotim kalabus taim bilong Abu Bakar Bashir

SIAMAN bilong Indonesia Nesenel Lo Komisin i tok, em i no nupela samting Indonesia Gavman long sotim kalabus taim bilong ol kalabus - maski ol i kalabusim ol long ol sas bilong terrorisim o nogat. Ripot i tok hetman bilong lotu Muslim, Abu Bakar Bashir, husat i stap kalabus long tripela ten (30) mun long em i kamapim tingting bilong ol Bali bom long 2002, em i wanpela long ol dispela lain em gavman i sotim kalabus taim bilong en bilong i go wantaim Indonesia indipendens de bilong Indonesia long trinde.

Gavman bilong Australia bai askim Inonesia gavman long i noken sotim kalabus taim bilong Bashir. Siaman bilong Nesenel Lo Komisin, Jacob Sahetapy, (sah-huh-TAH-pee) i bilip Indonesia mas bihainim tingting bilong Australia.

Tasol em i tok, ol dispela kalabus i bihainim gut ol oda long en, em ol mas sotim kalabus taim bilong ol. Maski em i teroris, sapos em i bihainim gutpela pasin, taim bilong em i mas sot bikos olgeta kalabus yet i mas kisim wankain luksave.

Olpela Indonesia Trade minister kalapus long corruptin sas

WANPELA bipo Tred Minista bilong Indonesia i statim pinis tupela yia kalabus long ol sas bilong paulim moni o korapsen. Ol i bin kisim Rahardi Ramelan i go long Cipinang Prison insait long Jakarta - bihain long Suprim Kot i no laikim laspela apil bilong en.

Tupela lowa kot i bin painim Mista Ramelan husat i

bin i go pas long stet lojistiks ejensi aninit long bipo presiden B.J. Habibie long 1999 i mekim rong long paulim samting olsem 4 milien dola bilong ejensi. Ol i bilip olsem oli bin yusim dispela moni long 1999 ilektorel kempen long taim Golkar pati i bin i stap long pawa long dispela taim Suprim kot i bin kalabusim bipo siaman bilong Golkar Pati na palamentari spika Akbar Tanjung long tripela yia long wankain sas long stat bilong 2004.

Empera blong Japan i no laik bai kantri i go ken long woa

JAPAN Empera i tok, em i no laik bai kantri bilong em bai go ken long narapela woa.

Em i tok olsem taim kantri i makim eniveseri bilong taim Wol Woa 2 i bin pinis insait long Pasifik.

Shane McLeod i ripot olsem, Gavman blong Japan i bin tokaut tu long bel hevi na tok sori long ol pasin nogut em i bin wokim long taim blong woa.

Sampela tausen pipel i bin stap long nesanel memorial sevis long Budokan Hall insait long Tokyo siti, em Empera Akihito i bin go pas long en.

"Lukluk i go bek long histori," Emperor i tok, "Mi no laik tru long ol hevi bilong woa i kamap gen."

Japan Prait Minista Junichiro Koizumi i bin givim aut wanpela toktok long pepa em i tokaut ken olsem, Japan i sori long World Woa 2, na bikpela bel hevi bilong en long ol pasin nogut Japan i bin mekim long taim blong woa.

Planti tausen pipel i bin go lukluk long Yasukuni shrine long Tokyo, we ol i save tingim ol Siapan soldia i bin dai long woa - sampela long ol dispela soldia em ol wo kriminal blong Wol Woa 2 husat ol i bin kotim ol.

Pacific BEAT

Listen to Radio Australia 101.9FM Port Moresby

4, 5, 6am & 4pm, 5pm including sport

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

RAGBI LIG

PNGRFL SP Kap

3:00 Broncos v Guria- Rabaul

POT MOSBI RAGBI LIG INC. SP LIG

Sarere Ogas 20, 2005

Table of rugby matches for Pot Mosbi Ragbi Lig Inc. SP Lig, Sarere Ogas 20, 2005. Includes matches like Kone Tigers vs Royals, Brothers vs Waliya, etc.

Sande Ogas 21, 2005

Table of rugby matches for Sande Ogas 21, 2005. Includes matches like Brothers vs Waliya, West vs Paga Panthers, etc.

Mande Ogas 22, 2005

Table of rugby matches for Mande Ogas 22, 2005. Includes match DCA vs Magani.

SOKA

POT MOSBI SOKA ASOSIESEN

GEM 19 - CATCH-UP GAMES

Sarere Ogas 20, 2005

Table of soccer matches for Gem 19 - Catch-up Games, Sarere Ogas 20, 2005. Includes matches like Maset vs Nomads, M/Yarangs vs Bomana PC, etc.

Sande Ogas 21, 2005

Table of soccer matches for Sande Ogas 21, 2005. Includes matches like Ela Utd vs Pacifica Utd, Guria vs Murat, etc.

Table of soccer matches for Oro Viles Soka Asosiesen, Sarere Ogas 20, 2005. Includes matches like Beda vs Tamata, Hillside vs Tufi Fjords, etc.

Oro Viles Soka Asosiesen

Table of soccer matches for Oro Viles Soka Asosiesen, Sande Ogas 21, 2005. Includes matches like Mambus vs Songe, Musa vs Zandas, etc.

Sande Ogas 21, 2005

Table of soccer matches for Sande Ogas 21, 2005. Includes matches like Mambus vs Songe, Musa vs Zandas, etc.

NEW ERIMA SPOTS

Ragbi Tas - Man

Table of rugby matches for New Erima Spots, Ragbi Tas - Man, Sarere Ogas 20, 2005. Includes matches like Gonix vs Inner Circle Dragons, Maus Rot Knights vs Hillside Spiders, etc.

Soka - Meri

Table of soccer matches for Soka - Meri, Sarere Ogas 20, 2005. Includes matches like Gende Rocks vs Rats, Top Town Casino vs Silver Stones, etc.

3:20 Wild Cats vs Megusa Crushers

Sande Ogas 21, 2005

Table of soccer matches for Sande Ogas 21, 2005. Includes matches like Neps vs Swamp Eels, K Rosters vs Border Panthers, etc.

EVEDAHANA SOKA ASOSIESEN

Sarere Ogas 20, 2005

Table of soccer matches for Evedahana Soka Asosiesen, Sarere Ogas 20, 2005. Includes matches like Junction vs Finka, Gala Konok vs Names Res, etc.

Sande Ogas 21, 2005

Table of soccer matches for Sande Ogas 21, 2005. Includes matches like Gee Neps vs Country Roots, Raitopos vs Gala Konok, etc.

Table of soccer matches for Sande Ogas 21, 2005. Includes matches like Nature vs KT Mahnduz meri, Sulu vs Kilengs, etc.

BASKETBOL

CBL

Table of basketball matches for CBL, Sarere 20 Ogas, 2005. Includes matches like Souths vs Muruks, Souths vs Muruks, etc.

Sande 21 Ogas, 2005

Table of basketball matches for Sande 21 Ogas, 2005. Includes matches like Chariots vs Saints, Chariots vs Saints, etc.

VOLIBOL

FAIRFAX

Maina & mesa semi fainol

Sir John Guise Indoor Stadium

Sarere Ogas 20, 2005

Table of volleyball matches for Fairfax, Sarere Ogas 20, 2005. Includes matches like Arnotts vs Trans Hi Way, Arnotts vs Trans Hi Way, etc.

OSI RUL

AFL PNG LIMITED

EDUCO junia raitman program

Sarere Ogas 20, 2005

Semi fainol

Colts Graun

Anda 12 manki

08:00 Idubada Tigers (3) vs St Peters Primary (4)

08:00 Kila Kila Primary (1) vs Lapwing-Lions (2)

Anda 13 manki

08:40 Kila Kila Primary (3) vs Lapwing Lions (4)

08:40 Idubada Tigers (1) vs Taurama Primary (2)

Anda 13 meri

09:40 Idubada Tigers (3) vs Lapwing Lions (4)

09:40 Kila Kila Primary (1) vs Taurama Primary (2)

anda 15 meri

10:30 Idubada Tigers (3) vs Gerehu High (4)

11:20 Kila Kila Primary (1) vs Taurama Primary (2)

Amni Park

Under 14 Boys

08:00 Taurama Primary (3) vs Bavaroko Primary (4)

08:50 Kila Kila Primary (1) vs Taurama Primary (2)

Under 15 Boys

09:40 Kila Kila High (3) vs Kaukana United (4)

10:30 St Peters Primary (1) vs Taurama Primary (2)

anda 18 meri

11:20 Gerehu High (3) vs Defence (4)

12:10 Taurama Primary (1) vs Dockers (2)

Anda 16 manki

1:00 La Sallian Crows (3) vs Hohola Dem (4)

2:00 Defence (1) vs Gerehu High (2)

Anda 18 manki

3:10 Dockers (3) vs Defence (4)

4:20 La Sallian Crows (1) vs Gerehu High (2)

Note: 3 vs 4 Loser out/Winner advance. 1 vs 2 Winner advance to G/Final and loser plays the 1/2 winner.

Sapos yu laik putim spot dro bilong yu long Wantok Niuspepa salim i kam long feks namba 325 2579 o salim long imel edres word@global.net.pg



Pot Mosbi osi rul

PNG Pukpuks painim wol kap ples

PAPUA Niugini Pukpuks bai i gat wan-pela tas sans long stap insait long ragbi union wol kap sapos ol i winim Vanuatu dispela Sarere long Pot Mosbi.

Ol i statim gut pinis kempen bilong ol taim ol i givim Solomon Islands 45-7 long Honiara tas wik na nau bai ol i traim long givim wankain marasin long Vanuatu.

"Mipela bai i lukluk tasol long sampela ol samting we i no kamap stret na traim

long stretim ol bipo long dispela bikpela gem," kosa bilong Pukpuks, Billy Rapilla i tok.

Em i tok ol i save olsem Vanuatu em ol lain bilong kamapim strongpela pilai na ol i save laik yusim ol fowet na strong bilong ol long gem long brukim difens. "Mipela i save olsem ol i gat strongpela gem olsem na mipela bai i wok long strongim difens bilong mipela long traim na pasim ol," Rapilla i tok. Em i tok ol bai kisim wanwan gem na traim long go

bungim Tonga husat ol i bin lus long ol long wol kap kwalifaia long 2002. "80 pesen bilong gem i kamap orait tasol, em i narapela 20 pesen tasol we mipela i mas wok long en," Rapilla i tok long gem bilong ol long Honiara. Dispela tim bilong Pukpuks tu i gat sevenpela nupela pilaia insait long en na Rapilla i amamas long pilai bilong ol.

"Mi amamas tru long ol, ol i no givim sans na i pilai strong tru taim ol i go insait long fit," em i tok. Yangpela winga

Richard Mark husat i wanpela sumatin long Divine Word University i skoaim wanpela trai long fes intanesenel gem bilong em we planti i tok em i namba wan trai stret long dispela gem.

Sapos ol i winim dispela gem bai ol i go moa yet na i gat sans long bungim Tonga gem we ol bai i mas bekim dinau bilong lus bilong ol tripela yia i go pinis long ol we dispela bai i helpim ol i gat sans long stap insait long 2007 wol kap salens long Frans.



Yu traim: Loi Walo bilong Scorpions i traim spaik tasol blok bilong U-mi Yet i strong tumas we i lukim U-mi Yet i win 3-1 set long wetim gren fainol bilong NCD volibol asosiesen kompetisen. Dispela pilai i kamap long Taurama Lesa Senta. Dispela wik Scorpions pilai gen sapos em i bungim gen U-met long gren fainol.



Em bilong mi: Pilaia bilong University Bulldog i traim strong wantaim pilaia bilong Mosbi long semi fainol bilong Pot Mosbi osi rul pitai long Colts pilai graun las wiken.



Klia: Strongpela Cosmos pilaia Andrew Lepani i tok taim em i sakim ol PS Rutz pilaia long Pot Mosbi A Gret soka long Bisini soka graun las wiken. Tupela i dro 3-3.



Kam kisim: PNG Pepes pilaia i pasim olgeta rot bilong Singapore pilaia long skoa tasol Singapore pilaia i strong moa na skoa. Singapore win we i mekim em i dro wantaim PNG 1-1 long dispela intenesenel siris namel long tupela kantri.



Yes yah: PNG pukpuk fowet Anthony Pangkatana i kisim tok welkam na amamas taim em i kamap long Jackson Intenesenel Eapot long Manda bihain long Pukpuk i win Solomon Ailan long kwalifai long intenesenel pilai.



Laikim yu nating tru: Tupela pikinini i amamas long papa Willie Yagomin long Jackson Intenesenel ples balus taim em i kam wantaim PNG Mosquito we PNG i lus long Niu Silan 18 poin (7.8.50-5.2.32) long Intenesenel Kap long Melbon, Australia las wiken. *Ol poto: ANDREW MOLEN*



NRL NIUS



Manly yutiliti Steve Matai i wanpela pilaia tasol long sait bilong tim long kamap long NRL judisari long kisim sas bilong em long takol em i bin mekim long Newcastle Knight prop Craig Smith. Sapos ol jas i painim aut olsem Matai i mekim asua dispela bai lukim em i no inap kamap long wanpela pilai bilong Manly. Long pilai bilong ol wantaim Knights ol i lus 22-14. Sapos i tru Matai bai kisim wankain mekimsave olsem Monty Betham bilong Nu Silan Warriors husat i mekim takol nogut long Storms pilaia.



Bai bai: Olgeta ai bilong Nu Silan bai stap long kepten bilong Warriors kepten, Stacey Jones, taim em i pilaim faspela pilai bilong em wantaim Warriors bipo long em i lusim sua na pilai wantaim Frans klab UTC long Inglan Supa Lig pilai. Bikipela pati bai kamap we Praim Minista bilong Nu Silan Helen Clark bai kamap tu long lukim. Jones, 29, i kamap long 237 NRL pilai.



Kisim bagarap: Parramatta senta Timana Tahu i luk olsem bai wet inap long namba tu wik bilong ol fainol bihain long han bilong em i bruk taim Eels i pilai wantaim Bulldogs las Fraide nait.

Tahu nau bai abrusim dispela wiken pilai wantaim St George Illawara long Oki Jubili Stedum. Nau yet long poin lata of Dragons i stap tupela poin bihain long Parramatta na Parramatta i stap tupela poin bihain long Broncos.



MALOLO: Brisbane Broncos kepten Darren Lockyer i kisim malolo bihain long em i kisim bagarap long lek bilong em long taim ol Broncos i pilaim Dragons long Sande na go daun long ol 24-4. Lockyer husat i no bin kisim kain bagarap bipo i tok em i no save hamas taim em bai kisim long malolo. "Ol bai skenim mi pastaim bipo long mi save," Lockyer i tok.



Sori tumas: Broncos pilaia Brent Tate em St George Illawara Dragon pilaia i hapim long wanpela pilai bilong ol bipo. Long dispela pilai Broncos win 34-24.

North Kwinnsien Cowboy kepten Travis Norton i tokaut olsem Brisbane Broncos em tim ol narapela tim i wokhat long winim.

Nau yet ol Broncos i go pas long kompetisen wantaim 34 poin. Bihain ol tasol em Parramatta Eels wantaim 32 poin.

Las wik ol Dragons i bekim dinau long hamarim Broncos 24-4 long Suncorp Stedum na ol Cowboy i go daun long West Tigers 28-16 long Campbelltown Stedum.

Long taim ol Tigers i mekim olsem dispela i givim ol sans long go insait long ol fainol. (Dispela bai namba wan taim long West Tigers i go insait bihain long Westen Sebeb na Balman Tigers i bung wantaim na kamapim West Tigers).

Ol Broncos nau i stap long ples nogut long wanem wanpela win moa bilong Parramatta na lus bilong Broncos i min olsem sans bilong Broncos long kisim 2005 NRL sisen maina primia nau bai go long han bilong Parramatta.

Las wik ol Eels i nekim Bulldogs 56-4 na i tok lukaut long Broncos pinis.

Bai gat sori o nogat: I luk olsem em i pinis bilong Niu Silan Warrior huka Monty Betham long pilai long 2005 sisen.

Dispela em bihain long NRL i givim wanpela sas long em long em i mekim wanpela takol nogut long pilaia bilong Storms las wik. Sampela taim long dispela wik em bai bungim ol jas bilong NRL na kisim kain mekimsave inap mak em sas ol jas i tokaut long en. Sapos ol jas i painim aut olsem asua bilong Betham i bikipela tru dispela bai narapela bikipela hetpen bilong ol Warriors kosa Tony Kemp bihain long ol i kapsait long Melbon. Moa yet ol Warriors i stap daunbilo long namba 12 ples na bai nogat sans long mekim top eit bilong mekim fainol.



Raun 24

Fraide, Ogas 19- West Tigers vs Bulldogs. Yu ken lukim long EMTV long 8.30 long nait.

Sarere, Ogas 20 -
Knights vs Warriors
Raiders vs Cowboys
Roosters vs Rabbitohs

Sande, Ogas 21 - Dragons vs Eels. Yu ken lukim dispela long EM TV long 4:00-6:00 avinun.

Dragons vs Eels
Sharks vs Sea Eagles

Bai: Storms

NRL Poin Lata (after rnd 15)

Klab	P	W	D	L	B	P/D	Pts	
1 Broncos	21	15	0	6	2	136	34	
2 Eels	21	14	0	7	2	199	32	
3 Dragons	22	14	0	8	1	134	30	
4 Wests Tigers	21	13	0	8	2	77	30	
5 Storm	22	12	0	10	1	172	26	
6 Cowboys	21	11	0	10	2	53	26	
7 Sea Eagles	21	11	0	10	2	-32	26	
8 Sharks	21	11	0	10	2	-42	26	
9 Bulldogs	21	9	1	11	2	-104	23	
10 Roosters	21	9	0	12	2	-25	22	
11 Raiders	21	9	0	12	2	-82	22	
12 Warriors	22	9	0	13	1	-3	20	
13 Panthers	21	8	0	13	2	-40	20	
14 Rabbitohs	21	7	1	13	2	-209	19	
15 Knights	2	6	0	1	15	2	-234	16

* P: Pilai, W: Win, D: Dro, L: Lus, B: Bye, P/D: Poin Diferens, PTS: Poin

Top 10 poin skora

Pilaia	Tim	Poin
1. Brett Hodgson	Sharks	216
2. Hazem El Masri	Bulldogs	180
3. Preston Campbell	Panthers	166
4. Luk Burt	Eels	150
5. Luke Covell	Sharks	148
6. Matt Orford	Storms	144
7. Stacey Jones	Warriors	137
8. Michael Witt	Sea Eagles	134
9. Darren Lockey	Broncos	133
10. Clinton Schifcoske	Raiders	126



Ting ting planti: Ol tim daunbilo long NRL pilai i pait hat long ol i no ken kisim las ples long 2005 sisen. Na tupela tim husat i mekim bikipela pait em South Sydney Rabbitohs na Newcastle Knights. Andrew Johns (antap) i tingting planti wantaim Knights tim.



Dai o stap laip yet

...Broncos skelim sindaun wantaim Guria

Paul Zuvani i raitim

DISPELA Sande i bikpela de bilong Rabaul Agmark Guria na Pot Mosbi Monier Broncos sapos ol bai go moa yet o bihainim narapela ol poroman bilong ol na hangamapim su inap long narapela SP Kap sisen long 2006.

Tupela bai bung long Rabaul long mesa fainol na painim aut husat bai go yet long bungim Brian Bell Bulldogs long gren fainol.

Las wik Broncos i pinisim ron bilong Lae LBC Bombers na Brian Bell Bulldogs i pusim bek Guria long pilaim Broncos long dispela Sande.

Long ol pilai bilong las wik sampela saveman bilong ragbi lig i tok Guria i fevoret bilong SP Kap taitol.

Ol i bin ting olsem ol Guria bai wet long gren fainol tasol abrus ol i lus long Bulldogs. Tasol ol i gat bilip yet olsem olsem Guria bai winim yet dispela pilai namel long ol na Broncos.

Long ol Broncos ol i mekim planti lain i kirap nogut long winim Bombers. Planti i ting Bombers bai win. Bombers i win ol i ting dispela bai lukim ol i bungim Bulldogs long mesa semi fainol we em sapos ol Dog i bin lus long Guria.

Na sapos Bombers i winim Bulldogs dispela i min olsem Bombers bai bungim Guria long gren fainol. Tasol gen ol pilai i no bin kamap olsem.

Narapela tingting we i bin ron tu olsem taim ol Broncos i win em ol i ting Bulldogs bai lus na lukim tupela Pot Mosbi tim i pait long ol yet long mesa semi fainol.

Na dispela ol i ting Broncos bai gat sans long winim Bulldogs. Na sapos Broncos i win dispela bai lukim ol i bungim Guria long gren fainol.

Gen mak bilong ol pilai i no bihainim dispela kain tingting.



Holim em! Ol Bulldog i kaikaim tit long daunim Lucas Solbat, traipela Guria man long pilai bilong ol las Sande. Dispela Sande Solbat bai givim het pen tu long ol brata bilong Bulldogs, Monier Broncos. Las Sande pilai i lukim Bulldogs i winim Guria 20-18. *Poto: ANDREW MOLEN*

Na olsem bal nau i han bilong Guria na Broncos long kisim i go na pilai wantaim Bulldogs long gren fainol.

Long lukim win bilong tupela tim ol bai i no inap lukluk moa long tim spirit.

Olgeta pilaia i mas gat wanpela tingting na tingting narapela narapela taim ol i pilai. I nogat wanpela pilaia tasol i save mekim tim i win. Olgeta pilaia long tim i stap long helpim tim i win.

Long ol lain ap i luk olsem tupela tim bai yusim wankain lain ap bilong las wik.

Long Guria kosa Norman Norris bai mas tok strong long ol pilaia bilong em olsem olgeta minit bilong pilai i bikpela samting inap long las wisil bilong referi.

Dispela kain tingting bilong las minit i stap yet na olsem bikos ol i go pas long pilai ol i ting ol i win pinis na i lukim ol i no inap was we i lukim Bulldogs i putim las minit trai na lukim ol i lus.

Moa yet Norris i mas tok strong long ol pilaia bilong em long was gut tu long 10-mita difens lain. Ol i no ken abrusim referi.

Dispela kain asua i mekim ol i kisim planti mekimsave las Sande.

Norris bai larim kepten na lok Michael Marum long dairektim pilai insait long pilai graun. Ful skwat long beklain em fulbek na ain man Menzie Yere, ol winga em Henry Wartovo na Luke Delly, senta Alison Tunia na Chris Purkikil, faiv eit Benson Kanini na hap

bek Jessie Alunga.

Long fowet lain em tupela prop Lucas Solbat na Charlie Aquila, huka Opisa Pomba, seken rowa Chris Lome na Oscar Tonga na lok yet em Marum. Ol senis em James Dummie, Ben Paiake, Sam Ponda na Ben Kakadep.

Lain ap bilong ol Broncos em beklain- Nickson Nagle long fulbek, Romalus Mago na Tony Supan long winga, seken ro em Leroy Muriki na Eki Ene, faiv eit Benjamin John na hap bek Bonfinui Illai.

Long fowet lain em ol prop Luke Kolalio na Andrew Iliam Jnr, huka Toua Kohu, seken ro Roy Tela na Solomon Hui na lok em Pautus Mondo. Ol risev em John Wagambie Jnr, Leonard Taru, Bal Kamane na Raphael Mua.



Ol Broncos i amamas bihain long ol i putim las wining trai bilong ol egensim LBC Bombers 24-16 long Lloyd Robson pilai graun las Sande.

Strongim tebol tenis

TOKSAVE nau i go long ol manmeri long ol i ken aplai long ol posisen long kamap eksekutiv opisa bilong PNG Tebol Tenis aninit long PNG Spot Federesen na PNG Olimpik Komiti.

Federesen i tok tebol tenis nau i wok long kamap strong long kantri na olsem ol i laik lukim gutpela man o meri long lukautim dispela pilai long kantri.

Opis i tok tenis i bin wok long kamap gut inap long sampela taim nau i no bin ron gut na olsem ol i laik kirapim bek dispela mak bilong pilai.

Federesen i laikim sampela interim opisa long plenim 2006 yia plen.

Bai i gat miting na makim wanpela opisa long Tunde dispela wik, 23 Ogas long Tisa Haus.

Dispela miting em seketeri jenerol bilong PNGSF Sir John Dawanincura bai go pas long en.

Long kisim moa tok-save ringim Federesen opis long telepon namba 325 1411 o 325 1449 o long imeil edres pngolycom@pngsfoc.org.pg

Pom kriket jenerol miting

Toksava i go long olgeta Pot Mosbi kriket klab- BNG Poreporena, Oil Search Hoods, Chubb United, Lamana Mariners Raukele, Mobil STC, TST Coasters, Dogura, Kempa, Pari, KCC Curies, Aussi Hai Kom, PB Cheung olsem Pot Mosbi Kriket Asosiesen bai holim eneul jenerol miting bilong em long PNG Institut ov Benking na Bisnis Menesmen Inc. (Benka Koles), Konedobu long Trinde Ogas 24 long 5:30 avinun.

Ol ajenda em long kisim na apruvim minit bilong bipo jenerol miting, kisim eneul na mani ripot bilong 2004, makim ol nupela opisel, makim ol nupela odita na tokaut long ol arapela bisnis.

Long save moa ringim Cheryl Amini long telepon namba 325 5411.

Diwai sempion bilong Madang volibol

Kelly Seneka i raitim

TUSBAB i pundaun sot liklik long larim Diwai i kisim tropi bilong Madang volibol gren fainol.

Pilai bilong las Sande i lukim Diwai winim Tusbab 3-1 set.

Tru Diwai i strongpela tim tasol taim ol i go long gren fainol ol i bin go insait olsem anda dog. Tusbab long narapel sait i bin go insait olsem fevoret.

Tasol long pilai stret Diwai i tanim plet. go pas long Diwai na bagarapim tingting bilong ol man em kepten yet na seta Eddie Tanago.

Em i mekim gutpela set long ol pilaia bilong em we dispela i helpim ol long straik gut long graun bilong ol boi Tusbab.

Long go pas long pairapim graun bilong Tusbab em Menson Vitaiba, Claudy Toimo na Joel Keimelo.

Gutpela pilai bilong ol i lukim ol i winim namba wan set 25-17.

Long namba tu set Tusbab i kam bek strong long bekim bek dinau. Dispela i lukim hita bilong ol Heni Mea na Emmanuel Mahuta i hatim lain bilong Diwai. Dispela i mekim na ol manki Diwai i paul long pilai bilong ol. Ol go het long winim set 25-19.

Long namba tri set dispela em narapela strongpela pilai gen we dispela i lukim tupela tim i paitim strong inap long Diwai i win 25-22.

Namba foa set i bihainim ron bilong namba tri wet we tupela tim i holim nek bilong tupela yet long longpela taim.

Ol sapota tu i painim hat long sindaun. Ol i no save husat tru bai win. Tasol tok oltaim i save stap, husat tingting bilong em i stap strong yet bai win na dispela i wankain long ol boi Diwai we ol i holim

han bilong pikus diwai inap ol i win 25-23.


Bihain long pilai kepten Tanago i tok em i tingting ol bai lus tasol gutpela hit na strongpela difens bilong ol i lukim ol i holim bek Tusbab.

"Mi amamas tru long dispela win long wanem mipela i wokhat long em. Em i no bin isi long sampela set," Tanago i tok.

"Mi tok tenk yu long ol pilaia bilong mi na ol sapota husat i pilai strong na sanap wantaim mipela inap mipela i win," em i tok.

Em i tok nokaut bilong ol i no strong olsem dispela gren fainol bilong ol. Na bipo long ol i go insait long dispela gren fainol ol i bin save olsem ol i kamap long wanpela strongpela pilai.

Long pilai bilong ol meri ol Wantok i nekim Normads 3-1 set. Normads maski ol i pilai strong i sot liklik long hit na difens bilong ol.



Traim bun: Bulldogs skipa Stanley Hondina i yusim olgeta strong long stopim narapela traipela man bilong Guria Charlie Aquila.

Dog pait

ol pilaia bai traim olgeta strong long kamapim win

Paul Zuvani i raitim

EM bai kisim foapela de moa long painim aut husat i papa bilong PNG intenesenel skwas tonamen taim ol pilaia i go insait long bikpela dro bilong pilai we i stat nau avinun long Holide Inn, Pot Mosbi.

Nau yet tupela man, Moha Azlan Iskandar bilong Malaysia husat i stap 17 long wol renk na Cameron Pilley bilong Australia husat i stap 35 long wol renk i stap fevoret.

Iskandar bai difenim taitol bilong em long las yia we Pilley i namba tu bilong em. Long wol renk ol narapela pilaia i stap longwe liklik ol we klostu long tupela em Timothy Manning bilong Australia i stap 67 long wol renk.

Tonamen dairekta na PNG top skwas pilaia Derek Hunter i tok dispela tupela bai kisim sampela gutpela salens long ol pilaia olsem Borja Golan bilong Spain husat i stap 55 long wol renk na Timothy Manning bilong Australia husat i stap 67 long wol renk.

Tasol i gat narapela ol pilaia bilong Australia, Hong Kong, Ingran, Jemeni, Kenada, Malaysia, Niu Silan, Pakistan na as ples PNG yet husat bai pait long winim dispela taitol na olsem dispela tonamen bai wanpela hatpela tonamen.

Friedrick Scheel bilong Jemeni husat i stap 199 long wol renk na husat i kam long kantri long namba wan taim i tok em i hop long mekim gut long dispela tonamen.

Aste nait em i pilaim Mark Gibbons bilong PNG we Wantok Spot i no inap kisim mak bilong gem long taim em i go long prin.

"Em i hat liklik long hia tasol mi hop mi mekim gut long dispela tonamen. Yu no save wanem samting bai kamap. Sapos mi laki mi win," Scheel i tok long telepon.

"I gat planti ol arapela pilaia mi mas pilai gut long win," em i tok.

Long em i kam namba wan taim em i tok PNG i naispela kantri tru.



Skwas tim kam: Sampela ol intenesenel skwas pilaia bilong Australia husat i kamap long Jackson Intenesenel ples balus long Mande dispela wik i tok olsem ol i redi long kamapim sampela gutpela pilai long intenesenel skwas tonamen.

"Ol manmeri i tok gut de na olgeta i smail. I narakain long hap mi kam long em long Yurop. Na mi laikim kaikai long hia. Dispela i naispela ples long stap na ol pipel tu i nais.

Wina bilong tonamen bai kisim total prais bilong pilai olsem \$US12,000 (K39,000) we prais mani yet em \$US2500 (K8064).

Gren fainol i kamap long Sande.

Pilai bilong aste nait i lukim Robin Clarke bilong Kenada i pilaim Chris Simpson bilong Ingran, Graeme Wilson (Nu Silan) pilaiam Damien Tam (PNG), Derek Hunter (PNG) kisim Michael Elford (Ingran) na Mark Gibbons

(PNG) pilaiam Friedrich Scheel (Jemeni).

Long Tunde dispela wik na aste nait sampela ol pilaia i pilaiam kwalifaing pilai long Pot Mosbi skwas klab we ol bai go insait long bikpela dro we i stat nau avinun.

Ol pilai bilong Tunde i lukim Chris Simpson bilong Ingran i winim Lerory Louis (PNG) 11-2/11-7/11-6, Damien Tan (PNG) winim Michael Rucklinger (PNG) 11-7/11-8/11-6, Derek Hunter (PNG) winim Scott Evans (PNG) 11-3/11-5/11-8, Michael Elford (Ingran) winim Joe Yominao (PNG) 11-4/11-6/11-6 na Mark Gibbons winim Alan Tsang (PNG) 11-9/11-8/11-10.

Ramu kosa mekim nogut long paitman

LAS wik Sarere sikspela Ramu paitman, long Madang provins i wokabaut long Pot Mosbi na go bek long Madang bihain long kosa bilong ol i lusim ol nating i stap bek long Pot Mosbi.

William Boruo i makim dispela ol paitman i tok long Mas dispela yia kosa bilong Martin Kaisa i kisim ol i kam long pait long nesanel Sokokan Karate tonamen long Pot Mosbi tasol bihain long pait Kaisa i kisim tiket bilong ol na go bek long Madang.

Em i no toksave long ol long taim em i go. Boruo i tok ol i stap nabaut wantaim ol narapela lain inap wanpela Koiari man i bungim ol na kisim ol i go stap wantaim ol long Bautaman, Sentrol provins.

Long Kaisa i lusim ol i go Boruo i tok Kaisa long dispela taim i tok em i gat dai long famili bilong em. Dispela em i gutpela tasol em i ron long em i no toksave long

wanem taim em i go. Moa yet em i kisim tiket bilong ol wantaim i go na dispela i givim bikpela heyi long ol.

Ol narapela paitman husat i wokabaut em Jonah Idau, Max Lemet, Morgan Moiso, Ben Donald na Jerry Tau.

Ol i bin go askim sampela wantok Madang na sampela Memba bilong Madang olsem rijinol memba bilong Madang, Sir Peter Barter, long helpim ol i go bek tasol i nogat gutpela bekim i kam long ol.

Long dispela as ol i nogat narapela wei long go tasol wanpela rot em bilong wokabaut olsem na dispela sikspela manki i stat wokabaut bihainim Kokoda Trek long las wik Sarere.

Long Popondetta ol bai kisim sip na go long Lae. Na long Lae ol bai kisim ka na go long Ramu.

Madang lokol kampani givim helpim

Paulus Tali i raitim

HAWKS ragbi lig klab long Madang ragbi lig nau bai putim olgeta tingting bilong kamapim gutpela pilai bihain long ol i kisim nupela jesi long wanpela liklik lokol kampani long Madang.

Nawon Trading las wk i givim nupela ol jesi wantaim trausis na soken long klab bihain long klab i askim em sapso em i ken helpim ol long nupela yunifom.

Wantaim dispela kampani i givim tu K700 mani i go long klab long baim wanem samting em i tingting long baim long helpim klab.

Raphael Mark, mausman bilong Hawks i givim bikpela tok tenk yu long kampani na i tok dispela em i namba wan taim long kain helpim i kam long wanpela lokol kampani long ol.

Papa bilong kampani husat i no laik long givim nem bilong em i tok olsem kampani i amamas long givim kain helpim olsem.

"Planti ol manki i stap nating na olsem klab tu i kam long dispela hap olsem na mipela i amamas long givim helpim," em i tok. "Na planti ol manki hia i sapota bilong Nawon Trading olsem na i gutpela kampani i mas bekim long givim kain helpim olsem.

Madang ragbi lig tu i no amamas long wanem planti klab i nogat gutpela yunifom bilong ol long pilai. Ol i askim ol klab long ol i mas go aut na askim ol kampani long Madang long givim sapot na sponsaim ol long pilai bilong ol.

Long dispela wei ol klab bai i gat bikpela hop na kamapim gutpela pilai na hapim level bilong pilai.

Pot Mosbi rot rana ron long Taun Pos Opis

DISPELA wik ol resis bilong Pot Mosbi rot rana bai kamap long Pot Mosbi Pos Opis.

I gat tripela resis 1.2 kilo mita, 3.5 kilo mita na 8.4 km. Olgeta resis bai stat long avinun tasol. ol rana bai mas bung faiv minit bipo long resis i kamap. Dispela long ol i harim toksave.

Na ron bilong Pot Mosbi rot rana long las wik Sarere i bin wanpela bikpela resis tru.

Ol rana i mekim gutpela spit tru long wanem i nogat strongpela san na win em i mekim ol kol liklik.

Sotpela resis we i kisim 2 kilom mita we i stat long TNT long 6 Mail bihain i go raunim ples balus na kam bek.

Longpela resis i kisim 7 kilo mita we i go long ples balus, i go olgeta antap long maunten we rada i stap long em na kam bek gen long TNT.

Sampela ol nupela rana i painim resis i gutpela tru bikos rot bilong ran i gat moa sampela samting em ol i laikim tru.

Long go antap long maunten em i hatwok na

lain bilong rana i kamap longpela tru.

Sampela i bin mekim gutpela spit i go antap long maunten tasol sampela i bin wokabaut.

Russel Hasu na Simon Pinampio i spit tru na go daun long maunten na Milton lakosi i bin painim hatwok tru long bungim tupela.

Mai Lakore long 2 kilo mita resis (9.52 minit) na Steven Kouru i kamap namba tu (10.14 minit), Dominic Bauai i kisim namba tru ples.

Long longpela resis Russel Hasu (26.26) we em i winim Simon Pinampio (26.28) inap long tupela seken tasol i go pas long em.

I mas i gat gutpela resis tru long dispela tupela rana. Milton lakosi i kisim namba tri ples long taim 26.52 minit, hap minit bihain long tupela.

Olgeta taim planti ol nupela rana i wok long joinim rot ran. Tasol sampela olpela rana i traim hat yet maskim ol salens i strong long ol long ron. Ol lapun olsem Jude Forde.

Hap hap spot

Lamana snuka

TU tausen win mani redi long husat pilaia i winim Lamana snuka taitol long dispela Sande. Bihain long tupela mun bilong kompetisen pilaia i kamap wantaim foapela top pilaia long go insait long gren fainol. Dispela foapela pilaia em- Tom English, Krippo Tosh, Jeffery Kennedy na Kim Kala. Wina bai kisim K2,000 win mani. Bihain long dispela em K500 long namba tu ples na K250 long namba tri na foa ples. Tasol nau nait bai gat pilai bilong dabol stat long 8:30 na prais mani em K10.

Nupela Gerehu soka asosiesen

GEREHU Soka Asosiesen long Pot Mosbi, we i stat tasol long dispela yia i kamapim ol strongpela na gutpela pilai. Presiden bilong asosiesen Charles Aopi i tok em i lukim planti ol manki i stap nating na olsem em i wantaim ol opisel bilong em i kirapim dispela asosiesen long kamapim ol pilai we i ken helpim ol mekim sampela samting. Dispela ol pilai i save kamap long St Charles Lwanga soka pilai graun. Aopi i tok nau yet 10-pela soka tim i stap pilai. I gat divison bilong man na i gat divison bilong meri. Ol tim em Octas, Dee Six United, Dry Creeks, Culture United, Namandis, Hard Rock, OM United, Giesi, Bradlies, DS United. Ol i go insait pinis long pri sisen bilong ol na bai statim propa sisen pilai long Septemba. Tingting bilong ol long kamapim dispela pilai i stat long taim sampela manki bilong ol i kamap long Sauten rijinol pilai long sampela taim long dispela yia. Aopi i tok nau yet ol i makim interim eksekutiv tasol bihain bai ol i makim tru tru ol opisel. Aopi i tok ol arapela lain husat em i wok wantaim em Desmond Waku na Joe Earo. Em i tok ol i gat tingting na redi pinis long afiliet long PNGFA. Aopi i tok liklik taim ol bai makim tim long pilai long Sentrol provins Gavana Alphonse Moroi Kap.

Guria nilim Pacific United

GURIA raunim tewel bilong Pasifik United we ol i pinisim win bilong ol 6-0 long Pot Mosbi A Gret soka long Bisini soka graun las wik.

Ol boi Guria i minim samting stret taim ol i krungutim graun we ol i no givim wanpela sans long ol manki United. Dispela win bilong Guria i bihainim ron bilong ol long wik bipo we ol i "kilim dai" paia bilong PS Rutz. Pes hap i lukim Guria kepten Raymond Nasa i go pas long ol pilaia bilong em we em i kisim gutpela bal long ol midfila bilong em na buletim i go insait long umben bilong United.

Bihain taim liklik ol i skoaim namba tu go we i kam long Udgin bihain long tupela ensin man David Panap na Toni Inikry i setim em klostu long 18 yad bilong maus bilong United gol mak. Pilai i ron gut i go we i lukim ol manki United i pilai strong long bekim dispela tupela gol.


Tasol ol straik bilong ol i no kisim mak stret ol bal bilong ol i go stret long Guria kipa Ronald Saimon. Moa yet difens bilong Guria i strong tumas na dispela i paulim pilai bilong ol United fowet. Klostu long hap taim malo- lo Jnr Bomba i skoaim namba tri gol bilong Guria. Long namba tu hap United i no was gut gen we tupela minit i go insait long pilai i lukim Brian Lapa i skoaim gen bilong Guria.

**LAE
BISCUITS CO.**



SPOTS


**LAE
BISCUITS CO.**



**PNG holim
intenesenel
skwas
Pes 31**

Nogat rot:

Bulldogs Thomas
Ninkama laikim ol
Dog i mas win maski
em i ksim bikipela
takol long Guria
Oscar Tonga long
pilai bilong ol las wik.
Was i stap em Guria
kepten Michael
Marum. Bulldog win
20-18. *Photo: ANDREW
MOLEN*



Dispela em gren painimaut moa long pes 30 fainol?

TOYOTA

Limited Stock
...with UNLIMITED FEATURES

RAV4
5 DOOR WAGON 4WD

FOR ENQUIRIES CONTACT:

3229400
Email: nhlm@otamotors.com.pg



- 2.0 litre 16 Valve engine
- 5-Speed Manual & Automatic transmission
- AM/FM Radio Cassette
- Central locking
- Power steering
- Power Windows
- Airconditioning
- Seating for 5 people

Ela Motors

EM6951

✓ TOYOTA QUALITY ✓ PARTS & SERVICE BACKUP ✓ 15 BRANCHES NATIONWIDE

TOYOTA TSUSHO (PNG) LTD.